

四庫全書

史部

欽定四庫全書

史部

山西通志卷一百十六

詳校官給事中臣王鍾健

檢討臣德生覆勘

總校官進士臣朱鈞

校對官學正臣常循

謄錄監生臣龍翔

欽定四庫全書

山西通志卷一百十六

人物

十六

大同府

北齊

可朱渾元字道元先世遼東人曾祖護野肱為懷朔鎮
將遂家焉元寬仁有武略少與齊高祖相知初隸介
朱榮以功封東縣伯孝武帝立為渭州刺史元既早

為高祖知遇恒表疏與高祖往來周文帝有疑心元
乃率所部發渭州西北度烏蘭津歷河源二州境乃
得東出從靈州東北入雲州高祖聞其來遣平陽守
高崇迎之至晉陽引見執手賜帛千疋并奴婢田宅
其兄弟四人先在并州者胥進官爵所部督將皆賞
以爵邑封元縣公除車騎大將軍從討西魏擒金祚
皇甫智遷并州刺史天保初封扶風王顯祖時屢立
戰功遷太師卒

薛孤延代人少驍果從神武起兵以功累加儀同三司
從西征至蒲津及竇泰失利班師延後殿且戰且行
一日斫折十五刀神武嘗閱馬於北牧道逢暴雨大
雷火燒浮圖神武令延觀之延按稍直前大呼繞浮
圖走火遂滅延還鬚及馬鬣尾皆焦神武嘆曰延乃
能與霹靂鬪後封平秦公討潁川專監造土山以酒
醉為敵所襲據齊初別賜爵都昌縣公延性好酒率
多昏醉以善戰每大軍征討常為前鋒位太子太保

張瓊字德連代人少壯健有武用為爾朱榮都督歷濟州刺史後歸神武拜滄州刺史加驃騎大將軍開府儀同三司天平中神武襲尅夏州以瓊為慰勞大使留鎮之尋為周所陷卒贈司徒都督恒州刺史瓊子欣尚魏平陽公主除駙馬都尉驃騎大將軍開府儀同三司建州刺史南鄭伯瓊常憂其太盛曰凡人官爵莫若處中欣位秩太高深為憂慮欣尋為孝武所害時人稱瓊先見

慕容紹宗字紹宗太原王恪之後也曾祖騰歸魏遂居
代祖郁岐州刺史父遠恒州刺史紹宗容貌恢毅少
言深沉有膽畧爾朱榮即其從舅子也榮欲悉誅洛
中人士對曰公既執忠義忽欲殲夷多士實謂非策
不從後以軍功封索盧侯遷爾朱兆長史及兆敗紹
宗於烏突城攜爾朱榮妻子并兆餘衆自歸神武加
恩禮官爵如故軍謀兵畧時叅預焉及遷鄴令紹宗
知府庫圖籍諸事累遷青州刺史丞相記室孫搴譖

之徵還元象初以軍功進爵公累遷御史中尉梁劉
烏黑入寇徐方授徐州刺史執烏黑殺之還除尚書
左僕射侯景反命紹宗為東南道行臺加開府改封
燕郡公擒梁貞陽侯蕭明於寒山迴軍討侯景于渦
陽時景軍甚盛初聞韓軌往討之曰噉猪腸小兒聞
高岳往曰此兵精人凡爾諸將被輕及聞紹宗至扣
鞍曰誰教鮮卑小兒解遣紹宗來若然高王未死邪
及與景戰諸將頻敗無肯先者紹宗麾兵徑進諸將

從之因大捷西魏遣王思政據潁川又以紹宗為南
道行臺堰洧水灌城與劉豐臨堰見北有塵氣乃入
艦同坐暴風從東北來纜斷飄艦徑向敵城紹宗自
度不免投水卒三軍將士莫不悲惋朝廷嗟傷焉贈
太尉謚曰景惠皇建初配享文襄廟庭

庫狄伏連字仲山代人事爾朱榮至直閣將軍後從神
武賜爵虵丘男天保初儀同三司尋加開府性質朴
勤公事直衛宮闕曉夕不離帝所頗以此見知然慙

而愚為鄭州刺史居室患蠅杖門者曰何故聽入武
平中封宜都郡王除領軍大將軍尋與琅琊王矯殺
和士開伏法

步大汗薩代郡西部人祖榮代郡太守父居龍驤將軍
領人別將薩初從爾朱榮入洛及平葛榮累功為都
督又從爾朱兆入洛及韓陵之敗降神武遷車騎大
將軍封行唐縣公晉州刺史齊初改封義陽郡公

綦連猛字武兒代人父元成燕郡太守猛少有志氣便

弓馬初事朱榮榮沒從兆朱京纏欲投齊神武
召與俱舉稍謂曰不從我者死從至途即背京纏復
歸兆兆敗猛見獲杖一百以配尉景既而為神武親
信後朱文暢將為亂猛曰昔事其父兄寧今日受
死不忍告而殺之神武聞之曰事人當如此舍其罪
而益親之以軍功封廣興縣侯梁使來聘求角武藝
文襄遣猛就館接之雙帶兩鞬左右馳射梁人引弓
兩張皆三石猛遂并取四張疊挽之過度梁人嗟服

天保初除東秦州刺史河清三年加開府突厥逼晉陽猛覘賊中一騎將超出來鬪即斬之天統五年除并省尚書令領軍大將軍封山陽王及和士開死漸預朝政趙彥深引知機事祖珽排之出為定州刺史削王爵以開府赴州寬惠清慎吏人稱之復授膠州刺史除大將軍齊亡入周卒初猛與尉興慶謝猥餒竝善射小心給事神武左右神武使相者視之曰猛大貴尉謝無官及芒山之役興慶被殺神武嘆曰富

貴定在天也

張纂字徽纂代郡平城人為尒朱兆長史使于神武遂
被顧識及相州拔參丞相軍事封武安縣伯累遷行
臺右丞從征玉壁軍還至晉州寒雨饑凍州以邊禁
不聽入城時纂為別使遇見輒令開門納之分寄人
家給其火食多所全濟神武聞而善之纂事神武二
十餘歲通傳教令甚見親賞文宣時卒於護軍將軍
婁昭字菩薩代郡平城人武明皇后之母弟也祖提雄

傑有識度家僮千數牛馬以谷量性好周給士多歸附之魏太武時以功封真定侯父內干有武力未仕而卒昭貴魏朝贈司徒齊初追封太原王昭方雅正直有大度深謀腰帶八尺弓馬冠時神武少親重之昭亦早識人雄曲盡禮敬數隨獵每言不宜乘危歷險神武將出信都昭贊成大策為中軍大都督從破尒朱兆於廣阿封安喜伯改濟北公又徙濮陽郡公授領軍將軍斛斯椿賀拔勝構間以疾辭還晉陽後

從入洛兗州刺史樊子鵠據城昭為東道大都督伐
之子鵠平諸將勸盡捕誅其黨昭曰此州無狀橫被
殘賊其賊是怨其人何罪遂皆捨焉後轉大司馬仍
領軍遷司徒出為定州刺史事委寮屬舉其大綱而
已卒于州贈假黃鉞太師太尉諡曰武齊初祭告其
墓封太原王皇建初配享神武廟庭長子仲達嗣改
封濮陽王次子定遠少歷顯職別封臨淮郡王武成
未受顧命位司空趙郡王秦黜和士開定遠納士開

賂遂成趙郡之禍尋除瀛州刺史與穆提婆有隙以
高思好事遇禍

張華原字國滿代郡人少明敏有器度初為齊神武驃
騎府法曹參軍賜爵新城伯累遷大丞相府屬深被
親待恒令宣諭意旨除散騎常侍周文據雍州神武
使華原入關說焉周文謂曰若能屈驥足於此當共
享富貴不爾命懸今日華原曰殞首而已不敢聞命
周文嘉其亮正乃使東還尋悔遣追不及神武以華

原久不返每嘆惜之聞其來喜見於色除相府右長
史遷驃騎大將軍特進進爵為公仍徙封新安後為
兗州刺史華原有幹略達政體至州廣布耳目以威
禁境內大賊及隣州亡命三百餘人詣華原歸款撫
以恩信放歸田里人懷感附冠盜寢息州獄先有繫
囚千餘人華原科簡輕重隨事決遣至年暮惟有重
罪者數十人各給假五日日期盡速還囚等曰有君
如是何忍背之依期畢至州境數有猛獸為暴華原

臨政州東北七十里甌山中忽有六駃食猛獸咸以
為化感所致卒官州人大小莫不號慕為樹碑立祠
四時祭焉贈司空公尚書左僕射子宰均嗣

房謨字敬放河南洛陽人其先居代本姓屋引氏少淳
厚沉深內敏正光末歷昌平代郡太守所在著廉惠
六鎮亂謨率郡人入九崢山結壘拒守無援乃率所
部奔中山鮮于修禮之亂朝廷以謨得北邊人情假
燕州事為脩禮所執仍陷葛榮榮敗尔朱榮啓授行

冀州事尋除太寧太守榮死其黨徵兵謨不應遣弟
毓詣闕孝莊以毓為都督毓弟欽為行臺竝持節詣
謨同為經畧後為賊黨建州刺史是蘭安定執繫州
獄蜀人聞謨被囚竝叛安定於是給謨弱馬令軍前
慰勞諸賊見謨莫不遙拜謨先所乘馬安定別給將
士戰敗蜀人得之謂謨遇害莫不悲泣善養其馬不
聽乘騎兒童婦女競投草粟皆言此房公馬也其結
愛人心如此尔朱世隆聞而嘉之捨其罪以為東北

道行臺神武入洛遷潁川太守孝武入關神武以謨
忠貞遣其弟毓為大使持節勞問時軍國未寧徵發
煩速至有數使共徵一物公私勞擾謨請事遣一使
下自催勒朝廷從之徵為丞相右長史以清直甚被
賞遇謨悉心盡力知無不為神武討關右以謨兼大
行臺左丞長史如故摠知府省務天平三年行定州
事請左右拾遺補闕固不肯行神武責而罷之未幾
出為兗州刺史謨選用廉清廣布恩信寮屬守令有

犯必知轉徐州刺史合境欣說謨為政如在瑕邱先
是當州兵皆寮佐驅使謨至咸加檢勒不令煩擾又
使傭賃令作衣服終歲還家無不溫飽全濟甚多神
武表謨清能以為勸勵徵拜侍中兼國史謨無他材
學每求退身不許尋兼吏部尚書加衛大將軍以子
子遠罪解官久之詔復本將軍起為大丞相左長史
除晉州刺史加驃騎大將軍攝南汾州事境接西魏
多所降附謨撫接殷勤人樂為用常以已祿物充饗

賚文襄嘉之聽用公物西魏懼乃增置城戍慕義者
自相糾合擊破之龍門已北西魏戍皆平文襄特賜
粟千石絹二百疋班示天下卒于州州府相帥贈物
及車牛妻子遵遺志拒而不納謨寡嗜慾貞白自守
內營家產足為富贍不假官俸是以世稱清白贈司
空諡曰文惠子廣嗣廣弟恭懿恭懿字慎言沈深有
局量達於從政仕齊平恩令濟陰太守竝有能名預
尉遲迴亂廢於家隋開皇初吏部尚書蘇威舉為新

豐令政為三輔最上嘉之賜物四百段以所得賜分給窮乏未幾復賜米三百石又賑貧人上聞止之時雍州諸縣令每朔朝謁上必呼恭懿至榻前訪以化下之術歷澤德二州司馬盧愷復奏其政美上復賜以帛授海州刺史未幾國子博士何妥奏恭懿尉遲迥之黨威愷曲相舉薦上怒恭懿竟放嶺南徵還至洪州卒論者寃之

侯莫陳相代人祖社伏顏魏第一領人酋長父斛古提

朔州刺史白水公相七歲喪父號慕過人及長性雄
傑從神武起兵破韓陵力戰有功封平陽縣伯改封
白水郡公天保初累遷司空公進白水王又遷大將
軍拜太尉公兼瀛州刺史歷太保朔州刺史又授太
傅別封義寧郡公卒于州贈假黃鉞右丞相太宰太
尉都督朔州刺史次子晉貴有幹畧襲白水王武衛
將軍開府儀同三司梁州刺史歸周授上大將軍封
信安縣公子仲宣太常丞子弘穎弘信雍州司士參

軍子行方行儉行恭

庫狄迴洛代人少有武力儀貌魁偉初事尒朱氏神武
舉兵擁衆來歸從破韓陵以軍功封順陽縣子累遷
夏州刺史昭帝初封順陽郡王大寧初為朔州刺史
轉太子太師卒贈太尉定州刺史

叱列平字殺鬼代郡西部人善射馭襲第一領人酋長
臨江伯魏末以軍功至武衛將軍隨尒朱榮破葛榮
平元顥封定陶縣伯後歸神武從破韓陵天保初累

遷兗州刺史開府儀同三司卒贈都督瀛州刺史諡
莊惠子孝冲嗣孝冲弟長义武平末侍中開府儀同
三司封新寧王隋開皇中位上柱國卒于涇州刺史
在官以清幹稱

王峻字巒嵩靈邱人明悟有幹畧歷事神武文襄為相
府佐賜爵北平男除營州刺史遠設斥堠廣置疑兵
邊賊不敢發合境獲安室韋不朝貢要其行路大破
之虜酋帥厚加恩禮放還遂獻誠款蠕蠕主菴羅辰

東徙峻設伏大破之於此遁走歷尚書河清中位南
道行臺以罪配甲坊武平初卒於侍中贈司空

段琛字懷寶代人少有武用從神武出山東起兵天保
中開府儀同三司兗州刺史

尉標代人從神武出山東太寧初位司徒封海昌王卒
子相貴嗣

范舍樂代人有武藝筋力絕人從神武出山東位東雍
州刺史開府儀同三司封平舒侯

康德代人從神武出山東歷數州刺史并省尚書左僕射開府儀同三司封新蔡王

尉相貴標子武平末開府儀同三司晉州道行臺尚書僕射晉州刺史及行臺左丞侯子欽等密啓周武帝請師求為內應周武自率衆至城下子欽等夜開城門引軍入鎖相貴送長安卒

尉相願標次子強幹有膽畧武平末開府儀同三司領軍大將軍自平陽至并州及到鄴每立計將殺高阿

那肱廢後主立廣寧王事竟不果及廣寧被出相願
拔佩刀斫柱而歎曰大事去矣知復何言

高寶寧代人武平末為營州刺史鎮和龍夷夏重其威
信周武帝平齊遣使招慰不受范陽王紹義在突厥
寶寧上表勸進范陽王署為丞相盧昌期據范陽起
兵寶寧引紹義集夷夏兵數萬救之至潞河知周宇文
文神舉屠范陽還據和龍

慕容三藏紹宗子幼聰敏多武畧頗有父風武平初襲

燕郡公以軍功歷武衛大將軍周師入鄴齊後主東遁委三藏留守鄴宮齊王公皆降三藏猶拒戰及齊平武帝引見恩禮甚厚授儀同大將軍隋開皇元年授吳州刺史九年副襄陽公韋洸討平嶺南洸卒詔檢校廣州道行軍事以功授大將軍後遷廓州刺史人歌頌之文帝數有勞問又畜產繁滋獲醍醐奉獻賚物百段十三年州界連雲山響稱萬歲者三詔頌郡國仍遣使醮山其日景雲浮於上雉兔馴壇側文

帝大悅改封河內縣男歷疊州總管和州刺史淮南
郡太守所在有惠政改授金紫光祿大夫大業七年
卒

北周

于謹字思敬代人粟磾六世孫沉深有識量略窺經史
尤好孫子兵書屏居未有仕進志或勸之謹曰州郡
之職昔人所鄙台鼎之位須待時來太宰元天穆見
之歎曰王佐材也及破六韓拔陵引蠕蠕為援大行

臺元纂討之夙聞謹名辟鎧曹參軍事從軍北伐蠕
蠕出塞謹追之前後十七戰盡降其衆後率輕騎出
塞覘賊屬鐵勒數千騎奄至謹以衆寡不敵散其騎
使匿叢薄間又遣人升山指麾若分部軍衆賊雖疑
有伏恃衆進逼謹謹以常乘駿馬一紫一駟賊先所
識乃使二人各乘一馬突陣而出賊以為謹爭逐之
謹率餘軍擊其追騎賊走因得入塞正光四年行臺
廣陽王元深北伐引為長流參軍使其世子佛陁拜

馬遂與廣陽破賊主斛律野穀祿等請馳往喻之謹
兼解諸國語單騎入賊示以恩信於是西部鐵勒酋
長也列河等三萬餘戶並款附相率南遷廣陽與謹
至析郭嶺迎接之謹曰拔陵間也列河等款附必來
要擊彼若先據險則難與爭鋒今以也列河等餉之
當競來抄掠然後設伏而待必指掌破之廣陽然其
計拔陵果來要擊破也列河於嶺上部衆皆沒謹伏
兵發賊大敗悉收也列河之衆孝昌元年又隨廣陽

王征鮮于修禮軍次白斗牛邏停軍中山侍中元晏
譖廣陽於靈太后且曰于謹智略過人為其謀主詔
立榜募獲謹者重賞謹聞之請詣闕披露腹心廣陽
許之謹遂到榜下曰吾知此人衆共詰之謹曰我即
是也有司以聞靈太后見之大怒謹備述廣陽忠款
兼陳停軍狀遂捨之後從爾朱天光戰韓陵天光敗
遂入關周文帝以謹為夏州防城大都督兼夏州長
史及賀拔岳被害謹言于周文曰關中秦漢舊都古

稱天府今若據其要害招集英雄足觀時變且車駕
在洛逼迫羣兇若請都關右挾天子而令諸侯千載
一時也周文大悅會有敕追謹為關內大都督謹因
進都關中策魏帝西遷從周文征潼關破回洛城授
北雍州刺史進爵藍田縣公大統三年東伐為前鋒
進拔弘農擒東魏陝州刺史李徽伯神武至沙苑謹
力戰進爵常山郡公又從戰河橋拜大丞相府長史
兼大行臺尚書再遷太子太保芒山之戰大軍不利

謹率麾下偽降立於路左齊神武乘勝逐北不以為
虞謹自後擊之敵大駭軍亂以此大軍得全十二年
拜尚書左僕射領司農卿侯景款附謹諫以為景情
難測周文不聽尋兼大行臺尚書大丞相長史鎮潼
關加授華州刺史賜柅鬯一卣珪瓚副馬俄拜司空
恭帝元年除雍州刺史命出攻梁元帝於江陵周文
餞于青泥谷長孫儉曰為蕭繹計將如何謹曰曜兵
漢沔席捲渡江直據丹陽是其上策移郭內居人退

保子城以待援至是其中策若難於移動據守羅郭
是其下策儉曰揣繹出何策謹曰必用下儉曰何也
曰蕭氏保據江南繇歷數紀屬中原有故未遑外略
又以我有齊氏之患必謂力不能分且繹懦而無謀
多疑少斷愚人難與慮始皆戀邑居既惡遷移當保
羅郭所以用下策謹令中山公護及大將軍楊忠等
先據江津斷其走路梁人樹木柵于外城廣輪六十
里謹悉衆圍之旬有六日外城遂陷梁主退保子城

翌日率其太子以下面縛出降尋殺之虜其男女十餘萬人收其府庫珍寶得宋渾天儀梁日晷銅表魏相風烏銅蟠螭趺大玉徑四尺圍七尺及諸輿輦法物以獻軍無私焉立蕭詧為梁主振旅而旋周文親至其第宴語極歡賞奴婢一千口及梁寶物并金石絲竹樂一部別封新野郡公固辭不許又令司樂作常山公平梁歌十首使工人歌之謹自以功名既立願保優閒乃上駿馬及鎧甲周文識其意曰今巨猾

未平公豈得便爾獨善不受六官建拜大司寇及中山公護受顧命而名位素下羣公各圖執政護密訪於謹謹曰今日必以死爭若對衆定策公必不得讓明日羣公會議謹曰丞相奄棄百寮嗣子雖幼而中山公親則猶子兼受顧託軍國大事理須歸之詞色抗厲衆皆悚動護曰此是家事護何敢辭謹既周文等夷護每申禮敬至是謹乃起曰公若統理軍國謹等便有所依遂再拜羣公迫于謹亦拜衆議始定孝

閔踐祚進封燕國公邑萬戶遷太傅太宗伯與李弼
侯莫陳崇等參議朝政賀蘭祥討吐谷渾明帝令謹
遙統其軍授以方略保定二年乞骸骨優詔不許三
年以謹為三老固辭又不許賜延年杖武帝幸太學
以食之三老入門皇帝迎拜屏間三老答拜有司設
三老席於中楹南向太師晉公護升階設席施几三
老升席南面憑几而坐師道自居大司寇楚國公寧
升階正烏皇帝升立於斧扆之前西面有司進饌皇

帝跪設醬豆親自袒割三老食訖皇帝又親跪授爵以醕有司撤訖皇帝北面訪道三老乃起立於席皇帝請誨三老言畢皇帝再拜受之三老答拜禮成而出及晉公護東伐謹時有病護以其宿將舊臣請與同行詢訪戎略軍還賜鐘磬一部天和二年又賜安車一乘尋授雍州牧三年卒年七十六武帝親臨詔譙王儉監護喪事賜繒千段粟麥千斛贈本官加使持節太師雍恒等二十州諸軍事雍州刺史諡曰文

及葬王公以下咸送郊外配享文帝廟庭謹有智謀
善事上名位雖重愈存謙挹每朝參往來不過兩三
騎朝廷軍國務多與謹決謹亦竭其智能故功臣中
特見委信始終若一人無間言每誠諸子務存靜退
子孫繁衍皆至顯達當時莫比

乙弗鳳朗子仕周位宮伯開府儀同三司與周閔帝謀
宇文護見殺

竇熾字光成扶風平陵人後漢大鴻臚章之後章子統

靈帝時鴈門太守避竇武之難奔匈奴為部落大人
後魏南徙子孫因家代賜姓紇豆陵武累世仕魏皆
至大官父略平遠將軍以熾著勲贈少保柱國大將
軍建昌公熾性嚴明有謀畧美鬚髯身長八尺二寸
少從范陽忻忻受毛詩左氏春秋通大義善騎射膂
力過人正光末隨略避地定州投葛榮榮破熾乃將
家隨爾朱榮於并州時葛榮別帥韓婁等據薊城熾
從驃騎將軍侯深討之手斬婁以功拜揚烈將軍孝

武即位蠕蠕等諸蕃竝遣使朝貢帝臨軒宴之有鴟
飛鳴殿前帝欲矜示遠人給熾御箭兩隻命射之應
弦而落諸蕃咸歎異焉尋隨東南道行臺樊子鵠追
忒朱仲遠時梁主遣元樹入寇據譙城子鵠令熾擊
破之封行唐縣子進爵上洛縣伯帝與齊神武構隙
以熾有威重拜閭內大都督遷朱衣直閭從帝西遷
仍與其兄善敗武衛將軍高金龍於千秋門因入宮
城取御馬四十四匹并鞍勒進之行所帝大悅賜熾及

善駿馬各二匹駕馬十匹大統元年別封正定縣公
從周文禽竇泰復弘農破沙苑皆有功河橋之戰諸
將退走熾獨從兩騎為敵人追至芒山熾乃下馬背
山抗之敵衆漸多矢下如雨熾騎士所執弓竝為敵
人所射破熾乃總收其箭以射之所中人馬應弦而
倒敵稍引退突圍出又從太保李弼討白額稽胡破
之高仲密以北豫州來赴熾從周文援之至洛陽會
東魏人據芒山為陣周文率輕騎奪擊熾獨追至石

濟而還大統十三年進使持節驃騎大將軍開府儀
同三司加侍中出為涇州刺史莅職數年政號清靜
改封安武縣公廢帝元年除原州刺史抑挫豪右申
理幽滯在州十載甚有政績州城北有泉水熾屢經
游踐嘗與僚吏宴於泉側及去職至此泉者莫不懷
之恭帝元年進爵廣武郡公蠕蠕寇廣武熾度河至
麴伏川大破之武成二年拜柱國大將軍保定元年
進封鄧國公邑一萬戶別食資陽縣一千戶收其租

賦天和五年自太宗伯左遷宜州刺史晉公護誅徵
拜太傅熾既朝之元老名望素隆軍國大謀常與參
議嘗有疾周武幸其第問之帝謀伐齊熾年已衰老
扼腕曰臣雖朽邁請執干櫓帝壯其志節以熾二子
武當公恭為左二軍總管齊平進位上柱國宣政元
年兼雍州牧周宣營建東京以熾為京洛營作大監
大象初改食樂陵縣邑戶如舊隋文輔政尉遲迥舉
兵熾移入金墉與洛州刺史平涼公元亨同心固守

權行洛陽鎮事相州平熾入朝文帝初為相國百寮
勸進自以累世受恩不肯署牋人高其節文帝踐極
拜太傅加殊禮贊拜不名開皇四年八月薨年七十
八贈八州諸軍事冀州刺史諡曰恭熾事親孝奉諸
兄以悌順聞位望隆重子孫皆處列位為當時盛族
子茂嗣茂有弟十三人恭威最知名恭位至大將軍
從周武平齊封贊國公除西兗州總管熾兄善以中
軍大都督南城公從魏孝武西遷仕至太僕衛尉卿

汾北華瀛三州刺史驃騎大將軍開府儀同三司永
富縣公諡曰忠子榮定嗣

竇榮定善子沉深有器容貌魁偉美鬚髯便弓馬為魏
文帝千牛備身周文竒之授平東將軍賜爵宜君縣
子北芒之役周師不利榮定帥精騎擊却齊師以功
拜上儀同尋進位開府襲爵永富縣公除忠州刺史
齊平加上開府拜前將軍飲飛中大夫其妻隋文帝
姊安成長公主也文帝少與契厚榮定亦知帝有人

君表尤相維結帝作相領左右宮伯使鎮守天臺總
統露門內兩廂仗衛常宿禁中尉遲迴初平朝廷頗
以山東為意拜洛州總管以鎮之前後賜縑四千疋
西涼女樂一部受禪來朝賜馬三百疋部曲八十戶
坐事除名公主曰天子姊乃作田舍兒妻尋拜右武
候大將軍上數幸其第恩錫甚厚以佐命功拜上柱
國歷位寧州刺史右武侯大將軍秦州總管突厥寇
邊為行軍元帥出涼州戰於高越原兩軍相持地無

水土卒渴甚死者十二三榮定仰天太息俄而澍雨
軍復振於是進擊數挫其鋒突厥憚之請盟而去賜
繡萬疋進爵安豐郡公復封子憲為安康郡公賜繡
五千疋拜右武衛大將軍帝欲以為三公固辭乃止
及卒帝為之廢朝令左衛大將軍元旻監護喪事賻
絹三千疋贈冀州刺史陳國公謚曰懿子抗嗣抗美
容儀性通率長於巧思父卒後恩遇彌厚位定州刺
史檢校幽州總管煬帝即位與漢王諒通謀除名弟

慶襲封陳公慶亦有姿容性和厚頗工草隸初封永富郡公位河東太守衛尉卿大業末為南郡太守弟璉亦工草隸頗解鐘律歷位潁川南郡扶風太守

楊纂廣寧人父安仁魏朔州鎮將纂少慷慨有志畧勇力兼人年二十從齊神武起兵信都軍功稍遷武州刺史以賞薄懷怨每嘆曰大丈夫富貴何必故鄉若以妻子經懷豈不沮人雄志大統初間行入關授征南將軍大都督封永興縣侯從周文解洛陽圍河橋

芒山之戰，纂每先登軍中，推其敢勇，遷驃騎大將軍，開府儀同三司，加侍中，進爵為公，賜姓莫胡盧氏，授岐州刺史。周孝閔踐阼，進爵宋熙郡公。保定元年，位大將軍，改封隴東郡公。除隴州刺史，從隋公楊忠東伐至并州而還。天和六年，進柱國大將軍，轉華州刺史。性質樸，不識文字，前後莅職，但推誠信而已。吏人以其忠恕，頗亦懷之。尋卒于州。子睿，位至上柱國，漁

陽郡公

陸騰字顯聖旭子少慷慨有大節從佗朱榮平葛榮以
功賜爵清河縣伯遷通直散騎常侍孝武西遷時使
青州遂留鄴為陽城郡守大統九年大軍東討陽城
被執周文釋而與語騰盛論東州人物敘述時事辭
理抑揚周文嘆曰卿真不肯本也即拜帳內大都督
除太子庶子遷武衛將軍騰既為周文所知思欲立
功安康賊黃衆寶等作亂詔騰率軍大破之還拜龍
州刺史使通江由路直出南秦周文謂曰此卿取柱

國之日即解所服金帶賜之州人李廣嗣李武等憑據巖險騰密令多造飛梯襲執廣嗣等於鼓下斬之進位驃騎大將軍開府儀同三司轉江州刺史進爵上庸縣公復擊殺陵州木籠獠等周明帝初陵眉等八州夷夏反攻破郡縣騰率兵討平之齊公憲作鎮於蜀以騰為隆州刺史兵馬鎮防皆委騰統攝趙公招代憲復請留之遷隆州總管領刺史保定二年資州石槃人據險自守騰率軍討破之而蠻獠恃險畔

服無常騰量山川形勢隨便開道莫不畏威承風稽顙請服所開之路多得古銘胥是諸葛亮桓溫舊道鐵山獠抄斷內江路使驛不通騰進軍討之一日下其三城招納降附者三萬戶帝以騰母在齊未令東討晉公護詭言齊已誅公母兄騰乃發哀泣血志在復讐晉公護東征命副齊公憲東伐天和初信州蠻蜚據江硤叛詔騰討之所向摧破築京觀以旌武功又討平涪陵郡守蘭休祖之亂巴蜀悉定詔令樹碑

記功績焉騰自在龍州至是前後破平諸賊凡賞得
奴婢八百口牛馬稱是四年遷江陵總管陳遣其將
章昭達圍江陵騰夜開門奮擊大破之陳人決龍川
寧朔隄引水灌江陵城騰親率將士戰于西堤陳人
乃遁加位柱國進爵上庸郡公建德二年徵拜大司
空尋出為涇州總管宣政元年冬薨於京師贈太尉
公諡曰定子元嗣元字士鑒仕齊為奉朝請成平縣
令齊平武帝見元特加勞勉即拜地官府都上士大

象末為隋文相府內兵參軍元弟融字士傾最知名
少歷顯職大象末位至大將軍定陵縣公

梁椿字千年代人從介朱榮入洛又從賀拔岳討平万
俟醜奴仍從周文平侯莫陳悅大統中以戰功封東
平郡公位開府儀同三司周孝閔踐阼除華州刺史
改封清陵郡公保定元年拜大將軍卒於位贈都督
恒州刺史諡曰烈椿性果毅善于撫納所獲賞物分
賜麾下每踐敵塲咸得其死力雅好儉素不營貲產

子明以椿功賜爵豐陽縣公襲椿爵舊封回授弟朗
伊婁穆字奴干代人父靈善騎射為周文所知嘗謂之
曰伊尹阿衡於殷致主堯舜卿既姓伊庶卿不替前
緒賜名尹歷衛將軍隆州刺史盧奴縣公穆弱冠為
周文帳內親信以機辯見知歷中書舍人通直散騎
常侍嘗入白事周文望見悅之字之曰奴干作儀同
面見我矣於是拜儀同三司賜封安陽縣伯周孝閔
踐阼進位驃騎大將軍建德中卒

趙昶字長舒天水南安人曾祖襄仕魏至中山太守因家於代昶弱冠以材力聞魏北中郎將高干鎮陝以昶為長史中軍都督周太祖平弘農擢為相府典籤清水氏作亂遣昶諭降之汾州胡叛再遣昶慰勞之皆知其虛實及大軍往討昶為先驅遂破之封章武縣伯拜安夷郡守帶長蛇鎮將氏俗荒獷昶威懷以禮莫不悅服加授帥都督誘斬叛氏除大都督行南秦州事時氏帥蓋鬧等反復討禽之又與史寧破宕

昌羗僚二十餘萬拜武州刺史恭帝初加驃騎大將
軍開府儀同三司討平潭水羗及鳳州興州叛賊昶
屢為將帥傾心下士虜獲氏羗撫而使之皆為昶盡
力太祖常曰不煩國家士馬而能威服氏羗者趙昶
有之矣周明帝錄前後功進爵長道郡公賜姓宇文
氏二年徵拜賓部中大夫行吏部卒

達奚武字成興代人祖眷父長並為鎮將武少倜儻好
馳射賀拔岳引為別將及岳為侯莫陳悅所害與趙

貴同翊戴周文帝從平悅封須昌縣伯大統初自大
丞相府中兵參軍出為東秦州刺史齊神武與竇泰
高敖曹三道夾侵周文欲并兵擊泰諸將多異議惟
武及蘇綽意同遂擒之周文進圖弘農遣武從兩騎
覘候武與其候騎遇即交戰斬六級獲三人而反齊
神武趣沙苑周文復遣武覘之武從三騎皆衣敵人
衣至暮下馬潛聽其軍號厯營若警夜者或有不如
法往往撻之具知敵情以告遂從破之進高陽郡公

四年周文援洛陽武為前鋒破莫多婁貸文又進至
河橋力戰斬其司徒高敖曹再遷雍州刺史復從戰
芒山時周軍不利齊神武乘勝至陝武禦之乃退七
年詔武經略漢川梁梁州刺史宜豐侯蕭修固守南
鄭武圍之修請服會梁將楊乾運救修修更不下武
擊走乾運修乃降自劍門以北悉平明年振旅還朝
議欲以武為柱國武曰我作柱國不應在元子孝前
固辭以大將軍出鎮玉壁周初授柱國大司寇齊豫

州刺史司馬消難來附詔迎之以歸武成初轉大宗
伯進鄭國公齊將斛律敦侵汾絳武禦之敦退武築
栢壁城留開府權嚴薛羽生守之保定三年遷太保
周軍東伐隋公楊忠引突厥自北道武以三萬騎自
東朔會晉陽武至平陽後期不進而忠已還乃班師
出為同州刺史明年從晉公護東伐時尉遲迴圍洛
陽為敵所敗武於芒山禦之至夜收軍齊王憲欲待
明更戰武曰洛陽軍散人情駭動不因夜速還明日

欲歸不得矣遂全軍而返天和三年轉太傅武居重
位不持威儀行常單馬左右從一兩人門外不施戟
或言其輕率武曰吾昔在布衣豈望富貴今日富貴
不可頓忘疇昔且天下未平國恩未報安可過事威
容乎武在同州時旱敕祀華岳岳廟舊在山下常所
祈禱武曰吾備位三公不能變理陰陽不可同於衆
人在常祀所必須登峰展誠尋其聖奧時武年逾六
十攀藤而上稽首祈請晚即于岳上藉草而宿夢白

衣執武手曰快辛苦甚相嘉尚武驚覺至旦雲霧四起俄而澍雨武帝璽書勞之賜綵百匹卒贈太傅十
五州諸軍事同州刺史諡曰桓

庫狄峙本段匹磾之後徙居代祖凌武威郡守父正上
洛郡守峙少以弘厚知名善騎射有謀畧仕魏高陽
郡守政存仁恕百姓悅之孝武西遷棄官從入關大
統元年拜中書舍人參掌機密以恭謹見稱遷黃門
侍郎朝議欲結和蠕蠕使峙往峙容貌魁梧善於辭

令蠕蠕主雅信重之自是不復為寇周文曰昔魏絳
和戎見稱前史以君方之彼有愧色封高邑縣公累
遷驃騎將軍開府儀同三司拜侍中蠕蠕滅後突厥
強盛雖與周通好而外連齊氏周文又令峙銜命喻
之突厥即執齊使來歸進安豐郡公歷小司空小司
寇明帝初為益州刺史都督三十一州諸軍事峙性
寬和尚清靜為夷獠所安後為宜州刺史入為少師
乞致政詔許之卒諡曰定子疑嗣少知名位開府儀

同三司職方中大夫蔡州刺史卒嶷弟徵從平齊拜
儀同大將軍賜爵樂陵縣公徵弟徽亦以軍功至儀
同大將軍保城縣男徽弟嶽性弘厚以齊右下大夫
從武帝東伐入并州軍敗侍臣殲焉及帝之出唯嶽
侍從以功授上儀同大將軍遷開府歷右宮伯賜爵
樂城縣侯仕隋至戶部尚書

竇毅字天武熾兄子父岳早卒以毅勲追贈大將軍冀
州刺史毅深沉有器度事親以孝聞魏孝武初起家

員外散騎侍郎齊神武擅朝毅慨然有徇主志從孝
武西遷封奉高縣子禽竇泰復弘農戰沙苑皆有功
進爵安武縣公恭帝元年進授驃騎大將軍開府儀
同三司大都督改封永安縣公出為幽州刺史周孝
閔踐阼進爵神武郡公保定三年拜大將軍與齊爭
衡並結突厥為外援許納女於周齊主亦遣使求婚
突厥欲有悔朝廷令楊荐等往迓十餘方復前好至
期往逆猶懼改圖以毅勲戚威重令為使毅至齊使

亦在突厥君臣有貳志殺抗言正色以大義責之卒
以皇后歸別封成都縣公進位柱國歷司州刺史蒲
金二州總管加上柱國入為大司馬隋開皇初拜定
州總管累居藩鎮咸得人和二年薨於州贈襄郢等
六州刺史諡曰肅毅性溫和謹慎自守尚周文帝第
五女襄陽公主特為朝廷所委信未嘗有矜情之容
子賢嗣賢字託賢志業通敏少知名宣政元年授使
持節儀同大將軍開皇中襲爵神武公除遷州刺史

毅第二女即唐高祖太穆后武德元年詔贈毅司空使持節總管荆郢等十州諸軍事荊州刺史杞國公又追贈賢子紹宣秦州刺史并襲賢爵紹宣無子乃以紹宣兄子德藏嗣

叱列伏龜字摩頭陁代郡西部人其先為部落大人魏初入附世為第一領人酋長龜容貌瓌偉腰帶十圍進止詳雅兼有武藝嗣父業復為領人酋長孝昌三年以別將從長孫承業西征累遷金紫光祿大夫從

還洛授都督遂為齊神武所寵任授大都督沙苑之
敗來降周文解縛禮之仍以邵惠公女妻之大統四
年封長樂縣公常從征討亟有戰功歷侍中驃騎大
將軍開府儀同三司恒州刺史卒子椿嗣椿字千年
明帝時位驃騎大將軍開府儀同三司改封永世縣
公天和初除左宮伯進位大將軍

尉遲迴字薄居羅代人父俟兜尚周文帝姊昌樂大長
公主武成初追贈柱國大將軍太傅長樂郡公諡定

迴少聰敏美容儀及長有大志好施愛士尚魏文帝
女金明公主拜駙馬都尉封西都侯大統十一年拜
侍中驃騎大將軍開府儀同三司進魏安郡公十五
年遷尚書左僕射兼領軍將軍周文深委仗之十六
年拜大將軍梁武陵王紀在蜀率衆東下梁元帝請
救周文曰蜀可圖矣取蜀制梁在茲一舉諸將多有
異同唯迴以為紀盡銳東下蜀地空虛伐之必有征
無戰周文曰伐蜀之事一以委汝於是令迴督開府

元珍乙弗亞侯呂陵始叱奴興綦連雄宇文昇等六
軍取晉壽開平林舊道前軍臨劍閣紀安州刺史樂
廣降紀梁州刺史楊乾運已送誠款而猶據潼水遣
元珍侯呂陵始等襲之乾運還保潼川珍等圍之乾
運降遂渡涪江至青溪時夏中連雨山路險峻迴親
勞問將士進軍圍紀益州刺史蕭撝紀前南梁州刺
史史欣景幽州刺史趙拔扈等為撝外援迴分遣元
珍乙弗亞擊破之拔扈遁走欣景降撝被圍五旬戰

頻敗乞降許之乃與紀子宜都王圓肅率其文武詣
軍門請見迴以禮接之號令嚴肅軍無私馬詔以為
大都督益潼等十二州諸軍事益州刺史三年加督
六州以平蜀功封一子安固郡公自劍閣以南得承
制封拜及黜陟迴明賞罰布恩威綏輯新邦經畧未
附夷人懷而歸之性至孝時大長公主年高多病周
文知其至性徵入朝以慰其母意仍賜迴衮冕之服
蜀人思之為立碑頌德拜小宗伯周初進柱國大將

軍取霍去病冠軍之義改封寧蜀公遷大司馬尋鎮隴右武成元年進蜀國公邑萬戶除秦州總管秦渭等十四州諸軍事隴右大都督保定二年拜大司馬從晉公護攻洛陽齊王憲等軍於芒山齊衆渡河諸軍驚散迴率麾下反行却敵諸將乃得全師而還遷太保太傅建德初拜太師加上柱國宣帝初為大右弼轉大前疑出為相州總管隋文帝輔政令迴子魏安郡公惇以會葬徵迴尋令鄆國公韋孝寬代為總

管迴謀舉兵留惇不受代遂殺長史晉昶集文武士
庶登城北樓而令之衆咸從命乃自稱大總管承制
署官司奉趙王招少子以號令迴弟子勤時為青州
總管亦從迴迴所管相衛黎毛洛貝趙冀瀛滄勤所
統青齊膠光莒諸州皆從之衆數十萬榮州刺史宇文
文胄申州刺史李惠東楚州刺史費也利進國東潼
州刺史曹孝達各據州以應迴徐州總管司錄席毗
前東平郡守畢義緒據兗州及徐州之蘭陵郡亦以

應迴永橋鎮將紇豆陵惠以城降迴迴又北結高寶
寧以通突厥南連陳人隋文帝以韋孝寬為元帥攻
之迴遣石慈攻建州刺史宇文弁以州降迴又遣韓
長業攻陷潞州執刺史趙威署城人郭子勝為刺史
赫連士猷攻晉州即據小鄉城紇豆陵惠襲陷定州
之鉅鹿郡遂圍恒州宇文威攻汴州烏丸尼尉遲儁
率膠光青齊莒兗之衆圍沂州檀讓攻陷曹亳二州
屯兵梁郡東南道行臺席毗衆號八萬軍於藩城攻

陷昌應下邑豐縣李惠自中州攻永州焚之而還宇文胄軍於洛口梁子康攻懷州魏安公惇率衆十萬人入武德軍於沁東孝寬等諸軍隔水相持不進隋文帝又遣高潁馳驛督戰惇兵布二十餘里麾軍少却欲待孝寬軍半渡而擊之孝寬因其却乃鳴鼓齊進惇遂大敗孝寬進至鄴迴與其子惇祐等又悉卒十三萬陣於城南勤率衆五萬自青州來赴麾下兵皆力戰孝寬軍失利而却鄴中士女觀者如堵高潁

與李詢先犯觀者因其擾而乘之迴衆大敗遂入鄴
走保北城孝寬縱兵圍之李詢以其屬先登迴上樓
射殺數人乃自殺勤惇祐等東走青州未至開府郭
衍追獲之迴自起兵至於敗凡經六十八日子誼開
府資中郡公誼弟寬大將軍長樂郡公先卒寬弟順
授開府安固郡公後以女為宣帝皇后拜上柱國封
胙國公順弟惇軍正下大夫魏安郡公惇弟祐西都
郡公皆被害而誼等諸子以年幼並獲全武德中許

改葬

尉遲綱字婆羅少與兄迴依舅氏周文帝入關迴綱與
母昌樂大長公主留晉陽後方入關常陪侍帷幄出
入卧内以軍功封廣宗縣伯綱驍果有膂力善騎射
周文委以心膂河橋之戰周文馬中流矢綱與李穆
等左右力戰文帝方得乘馬大統十四年進平昌郡
公廢帝二年拜大將軍兼領軍及立齊王仍為中領
軍總宿衛事迴伐蜀綱從周文送於城西周文命射

走兔誓曰若獲此兔必當破蜀俄網獲兔而返又嘗
從狩雲陽見五鹿俱走網獲其三周初掌禁兵除小
司馬明帝初進柱國大將軍武成元年進吳國公邑
萬戶除涇州總管歷少傅大司空陝州總管晉公護
東伐留鎮京師軍還復歸鎮天和二年以政績可紀
賜帛及錢穀增邑以褒賞之阿史那后入塞詔綱率
衆迎衛三年追論河橋功封一子縣公四年卒贈太
保諡曰武子安以嫡嗣大象末位柱國入隋歷鴻臚

卿左衛大將軍

尉遲運綱長子少彊濟志在立功魏大統十六年以父
勲封安喜縣侯周明帝立以定策勲進周城縣公歷
隴州刺史遷左武伯中大夫尋加軍司馬職兼文武
甚見委任進廣業郡公轉右司衛時選忠諒鯁正者
匡弼東宮以運為右宮正建德三年帝幸雲陽宮又
令兼司武與長孫覽輔皇太子居守衛刺王直率其
黨襲肅章門覽懼走運時偶在門中直兵奄至不暇

命左右手自闔門直黨與運爭門斫傷運指僅而得
閉直既不得入乃縱火運恐火盡直黨得進取宮中
材木及牀以益火用膏油灌之火轉熾久之直不得
進乃退運率留守兵因其退擊之直敗走是夜微運
宮中已不守矣武帝嘉之授大將軍四年出為同州
刺史同州蒲津潼關等六防諸軍事帝伐齊召運參
議五年拜柱國進盧國公轉司武上大夫總宿衛軍
事及雲陽宮秘喪未發運總侍衛兵還京師宣帝初

授上柱國運為宮正時嘗進諫又與王軌宇文孝伯等皆為武帝親待軌被害出為秦州總管以憂卒贈大後丞七州諸軍事秦州刺史諡曰忠子靖嗣運弟勤大象末青州總管起兵應迴勤弟敬尚明帝女河南公主位儀同三司

達奚震字猛畧武子少驍勇走及奔馬周文嘗渭北校獵時有兔過震射之馬倒而震足不傾躓因步走一發中兔馬纔起遂回身騰上周文喜曰非此父不生

此子賜雜綵一百段後封魏昌縣公明帝初拜司右
中大夫加驃騎大將軍開府儀同三司武成初進廣
平郡公除華州刺史頗有政術天和三年拜柱國建
德初襲鄭國公從平鄴拜太宗伯震父嘗為此職時
論榮之宣政中出為原州總管隋開皇初卒於家

達奚基武子大象末益州刺史與王謙起兵被害

隋

達奚長儒字富仁代人祖侯魏定州刺史父慶驃騎大

將軍儀同三司長儒少懷節操膽烈過人十五襲樂安公周太祖引為親信以質直恭樸授大都督數有戰功天和中除渭南郡守遷驃騎大將軍開府儀同三司從平齊遷上開府進安成郡公別封一子縣公宣政元年除左前軍勇猛中大夫後與烏丸軌圍陳將吳明徹於呂梁陳遣驍將劉景率勁勇七千來援長儒逆拒之取車輪數百繫以大石沉之清水連轂相次景軍至船艦礙輪不得進乃縱奇兵水陸俱發

大破之獲明徹以功進大將軍尋授行軍總管北巡沙塞卒與虜遇接戰大破之文帝作相王謙舉兵於蜀沙氏楊永安扇動利興武文沙龍等六州以應謙詔長儒擊破之謙二子亡歸並捕斬之隋初進上大將軍封蘄春郡公開皇二年突厥沙鉢畧衆十餘萬南掠詔為行軍總管率衆二千擊之遇於周槃衆寡不敵軍中大懼長儒慷慨神色愈烈為寇所衝突散而復聚轉戰三日五兵咸盡士卒以拳毆之手皆骨

見凡十四戰殺傷萬計虜氣奪乃解去長儒身被五
創通中者二戰士死傷十八九突厥本欲大掠秦隴
既逢長儒兵皆力戰意大沮明日於戰處慟哭而去
優詔加上柱國餘勲迴授一子戰亡將士皆贈官三
轉世襲授長儒寧州刺史尋轉鄜州母憂去水漿不
入口五日上嘉歎起為夏州總管突厥憚之不敢窺
塞以病免又除襄州總管在職二年轉蘭州總管涼
原靈三總管皆受節度率衆出祁連山西至蒲類海

還復轉荊州總管三十六州諸軍事高祖曰江陵要害國之南門今以委公朕無慮也歲餘卒官諡曰威子嵩大業時太僕少卿

吐萬緒字長緒代郡鮮卑人父通周郢州刺史緒有武畧起家撫軍將軍襲爵元壽縣公數從征伐累遷大將軍小司武隋初拜襄州總管進穀城郡公尋轉青州總管頗有治名歲餘以緒有威畧徙朔州總管甚為北夷所憚文帝有吞陳志轉徐州總管令修戰具

及大舉濟江領行軍總管屯兵江北陳平拜夏州總
管晉王廣在藩頗見親遇後引為東宮右虞候率及
嗣位拜晉絳二州刺史馳傳之官未出關而漢王諒
已遣兵據蒲阪斷河橋緒不得進詔率兵從楊素擊
破之拜左武侯將軍大業初轉光祿卿賀若弼遇讒
引緒為證緒明其無罪坐免歲餘守東平太守南巡
迎謁命升龍舟緒因頓首陳謝拜金紫光祿大夫太
守如故征高麗請為先鋒拜左屯衛大將軍率馬步

數萬指蓋馬道及班師留鎮懷遠進左光祿大夫徵
討劉元進緒率衆至揚子津元進自茅浦將渡江緒
勒兵擊走緒因濟江背水為柵明旦又大挫之賊解
潤州圍而去緒進屯曲阿元進復結柵拒緒挑令出
戰乘陣未整騎突之賊衆遂潰赴江死者數萬元進
夜遁偽僕射朱燮管崇等屯毗陵連營百餘里緒乘
勢進擊復破之賊退保黃山進軍圍虜賊請降元進
朱燮僅以身免陣斬管崇及陸顛等五千餘人收子

女一萬餘口進解會稽圍元進復據建安令進討之
緒以士卒疲敝請息甲待來春坐配防建安尋詔徵
緒還至永嘉疾卒

尉遲崇代人周儀同大將軍以兵鎮恒山時隋高祖甚
親待之及為丞相崇以尉遲迴宗族自囚於獄遣使
請罪高祖慰諭之令入朝恒置左右開皇初封秦興
縣公歲餘從行軍總管達奚長儒擊突厥於周槃力
戰而死贈大將軍豫州刺史後下優詔令子義臣姓

楊氏編之屬籍

杜彥雲中人性勇果善騎射初仕周以功拜隴州刺史
賜爵永安縣伯隋文帝為丞相從韋孝寬擊尉遲迥
以功進位上柱國改封襄武縣侯拜魏郡太守隋初
授丹州刺史進爵為公徵為左武衛將軍以行軍總
管與韓擒虎平陳進位柱國賜其子寶安爵昌陽縣
公高智慧之亂復以行軍總管從楊素討平之又擊
斬彭山賊李阬及徐州封宜二洞叛人拜洪州總管

有能名徵拜雲州總管突厥畏憚之遼東之役以行
軍總管從漢王至營州以彥曉習軍旅令總統五十
營事及還拜朔州總管突厥寇雲州帝令楊素擊走
之猶恐為邊患復拜彥雲州總管卒子寶虔大業末
至文城郡丞

賀婁子幹字萬壽代人以驍武知名開皇初為行軍總
管從元諧擊吐谷渾於涼州功居優明年復大破突
厥於蘭州冊授上將軍尋拜工部尚書及突厥吐谷

渾復犯塞又悉破之高祖以其曉習邊事授榆關總管十鎮諸軍事歲餘拜雲中刺史為敵所憚卒諡懷庫狄欽代人性弘厚有局度開皇中官民部尚書

楊義臣代人尉遲崇子崇死事以義臣襲崇官爵時尚幼養于宮中年未弱冠奉詔宿衛賞賜甚厚上嘗從容言及恩舊嗟歎久之因下詔賜姓楊氏編之屬籍為皇從孫賜錢三萬貫酒三十斛米麥各百斛尋拜陝州刺史義臣性謹厚能馳射有將領才上甚重之

後突厥達頭入塞以行軍總管率步騎三萬出白道
遇戰大破之突厥又入雁門馬邑義臣擊之寇遂出
塞追至大斤山與史萬歲合軍擊大破之功不錄仁
壽初拜朔州總管賜御甲四年八月漢王諒將喬鍾
葵攻代州總管李景詔義臣救之義臣率馬步二萬
夜出西徑鍾葵兵銳甚義臣詭伏牛驢數千頭於澗谷
鳴鼓疾進鍾葵軍以為伏兵發因而大潰縱擊破之
以功進位上大將軍賜物二千段雜綵五百段女妓

十人良馬二十匹尋授相州刺史後三歲徵為宗正
卿轉太僕卿從征吐谷渾屯琵琶峽連營八十里南
接元壽北連段文振合圍渾主於覆袁川及征高麗
至鴨綠水與乙支文德戰每為先鋒一日七捷後坐
免俄而復位明年為軍副趣平壤會班師檢校趙郡
太守妖賊向海公寇扶風安定間奉詔擊平之尋復
從東征進左光祿大夫時渤海高士達清河張金稱
並聚眾數萬攻陷郡縣段達討之不能尅詔義臣率

東征還兵擊之大破士達斬金稱又收合降賊入豆
子飢將格殺擒之以狀聞奏而義臣威名盛遽追入
朝賊由是復熾義臣以功進光祿大夫尋拜禮部尚
書卒官

房兆代人本姓屋引氏剛毅有武畧頗為行軍總管擊
胡官至上柱國徐州總管

唐

于邵字相門代人僑萬年天寶末第進士以書超絕補

崇文校書郎由比部郎中為道州刺史徙巴州部獠
薄城邵勵兵拒戰且遣使諭曉獠丐降邵儒服出賊
見皆拜即引去遷梓州辭疾授兵部郎中崔寧表度
支副使俄以諫議大夫知制誥進禮部侍郎朝有大
典冊必出其手為三司使治薛邕獄貶桂州長史復
為太子賓客坐杭州刺史貶衢州別駕徙江州卒年
八十一邵孝悌有行晚塗益修潔樊澤始舉賢良邵
望見曰將相材也崔元翰舉進士年五十矣邵以其

文擢異等曰後當司詔令已而皆然獨孤授舉博學
宏辭吏部考當乙邵覆之置甲科人咨其公

侯仲莊蔚州人為定武將軍擒安太清有功累加冠軍
將軍僕固懷恩叛仲莊訓兵自守德宗幸奉天遷左
衛將軍留鎮奉天者幾二十年

宋長生廣昌人河內太守忠以竭力義不屈節

山西通志卷一百十六

欽定四庫全書

史部

山西通志卷一百十七

詳校官給事中臣王鍾健

檢討臣德生覆勘

總校官進士臣朱鈞

校對官學正臣湯垣

謄錄監生臣劉廷勳

欽定四庫全書

山西通志卷一百十七

人物

十七

大同府

後五代

李國昌初名赤心朱邪執宜子也懿宗咸通十年神策
大將軍康成討討龐勛於徐州以為太原行營招討
沙陀三部落軍使從破勛拜單于大都護振武軍節

度使賜姓名曰李國昌屬宗正籍國昌恃功橫恣懿宗患之十三年徙雲州刺史大同軍防禦使國昌稱疾拒命子雲州守捉使克用乃殺大同軍防禦使段文楚據雲州唐以盧簡方為振武節度使會幽并兵討之行至鳳州軍潰由是沙陀侵掠代北矣明年僖宗以李鈞為宣慰沙陀六州三部落使拜克用大同軍防禦使居久之國昌出擊党項吐渾赫連鐸襲破振武克用自雲州往迎而雲州人亦閉關拒之國昌

父子轉掠蔚朔間得兵三千國昌入保蔚州克用還據新城僖宗乃拜李鈞為代北招討使以討之乾符五年沙陀破遮虜軍又破哥嵐軍而唐兵數敗沙陀由此北據蔚朔南侵忻代嵐石至於太谷焉廣明元年招討使李琢會幽州李可舉雲州赫連鐸擊沙陀克用與可舉相拒雄武軍其叔父友金以蔚朔州降於琢克用遽還可舉追至藥兒嶺大敗之琢軍夾擊又敗之於蔚州沙陀大潰克用父子亡入塞北中和

三年克用平長安拜河東節度使以國昌為雁門以北行營節度使十月卒

李克讓少善騎射為振武軍校從討王仙芝以功拜金吾衛將軍留京師李氏以部族歸唐嘗遣二子宿衛賜第親仁坊其後克用起兵唐遣王處存以兵圍親仁坊捕之克讓與僕何相溫石的歷等十餘騎彎弧躍馬突圍而出處存以千餘人追至渭橋克讓等射殺百餘人追兵乃止克讓奔於雁門明年克用復歸

唐克讓還宿衛京師黃巢犯長安克讓守潼關為賊所敗奔於南山匿佛寺被殺

李克修字崇遠從討龐勛以功拜朔州刺史克用鎮雁門以為奉誠軍使從入關為先鋒遷左營軍使克用取潞州表昭義軍節度使數出山東擊方立又與李罕之攻寇懷孟之間其後克用自將擊方立還軍過潞克修性儉嗇供饋甚薄克用大怒詬而笞之克修慙憤發疾卒二子嗣弼嗣肱嗣弼為涿州刺史天佑

十一年契丹攻破涿州嗣弼沒馬嗣肱少有膽畧從周德威數立戰功為馬步軍都虞候李存審敗梁軍於胡壁嗣肱獲梁將一人梁太祖圍蓆縣從存審救蓆梁軍解去嗣肱功為多超拜蔚州刺史雁門以北都知兵馬使累遷澤代二州刺史新州王郁叛嗣肱取媯儒武三州拜新州刺史山北都團練使同光元年春卒於官

李克恭初為決勝軍使克修卒代為昭義軍節度使克

修簡儉潞人素安其政且哀其見笞以死而克恭橫
暴多不法又不習軍事潞人皆怨牙將安居受殺之
李克寧為人仁孝事克用小心不懈克用所歷未嘗不
從行克用鎮太原以為內外都制置蕃漢都知兵馬
使檢校太保振武軍節度使軍中之事無大小皆決
於克寧克用病召莊宗侍側屬張承業與克寧曰以
亞子累公等莊宗將立告於克寧曰兒年孤稚敢以
軍府煩季父以待兒之有立克寧曰吾兄之命以兒

屬我誰敢易之因下而北面再拜稱賀莊宗乃即晉
王位克用養子存顯存實誘說之克寧曰吾家三世
父慈子孝先王土宇苟有所歸吾復何求也克寧妻
孟氏素剛悍存顯等各遣其妻入說孟氏克寧仁而
無斷惑於羣言殺都虞候李存質而與張承業李存
璋有隙又求兼領大同軍節度使於是幸臣史敬鎔
見太后告克寧與存顯謀執王及太后以降梁承業
等請誅克寧乃伏兵於府置酒大會克寧既至執而

殺之

李存美存霸存禮存渥存又存確存紀胥後唐太祖子
莊宗弟同光三年十二月辛亥詔封存美邕王存霸
永王存禮薛王存渥申王存又睦王存確通王存紀
雅王存又歷建雄保大二軍節度使娶郭崇韜女及
崇韜被族宦官因欲盡誅崇韜親黨以絕後患乃誣
言存又過妖人楊千郎家酒酣攘臂號泣為婦翁稱
冤遂被害存霸歷昭義天平河中三軍節度使存渥

歷義成天平二軍節度使皆居京師食其俸祿而已
趙在禮作亂乃遣存霸於河中莊宗再幸汜水徙存
霸北京留守存渥河中節度使存渥旋奔太原行至風
谷為部下所殺存霸亦自河中奔太原比至麾下皆
散去惟使下康從弁不去存霸乃剪髮衣僧衣謁苻
彥超曰願為山僧冀公庇護彥超欲留之為軍衆所
殺存紀存確奔南山匿民家安重誨霍彥威遣人即
民家殺之存美素病風居太原與存禮皆不知其所

終

李存孝代州飛狐人本姓安名敬思太祖掠地代北得之給事帳中賜姓名以為子常從為騎將文德元年遣存孝與薛阿檀安休休等以兵七千助李罕之還擊河陽戰於溫縣梁軍先扼太行安休休被執是時晉已得澤潞歲出山東與孟方立爭邢洺磁存孝未嘗不在兵間方立死晉取三州存孝功為多明年潞州軍亂殺李克恭梁遣李讜攻李罕之於澤州存孝

以騎兵五千救之梁軍呼罕之曰公常恃太原以為
命今上黨已歸唐唐兵大集圍太原沙陀將無穴以
自處公復誰恃而不降乎存孝以精騎五百繞梁柵
而呼曰我沙陀之未穴者待爾肉以食軍可令肥者
出關梁驍將鄧季筠引軍出戰存孝舞稍擒之李謹
敗走追擊至馬牢關還攻潞州節度使孫揆以梁卒
三千為衛襄衣大蓋擁節先驅存孝以三百騎伏長
子西崖谷間伺揆軍過橫擊斷之擒揆以歸初梁遣

葛從周朱崇節守潞以待揆聞之皆弃去晉遂復取潞州是時張濬韓建伐晉擊陰地關晉以李存信薛阿檀等當濬別遣存孝軍於趙城唐軍戰敗濬退保晉州韓建走絳州存孝攻晉州濬兵出戰輒復敗因閉壁不敢出存孝去攻絳州濬建皆走存孝猿臂善射身被重鎧索弓坐稍手舞鐵槌出入陣中以兩騎自從戰酣易騎上下如飛初存孝取潞州功為多而太祖別以康君立為潞州留後存孝為汾州刺史存

孝負其功不食者數日及走張濬遷邠州刺史大順
二年徙邢州留後是時晉軍連歲攻趙常山存孝常
為先鋒下趙臨城元氏幽州李匡威救之晉軍輒引
去存孝素與存信有隙存信譖之曰存孝有二心常
避趙不擊存孝不自安乃附梁通趙自歸於唐唐命
趙王王鎔援之明年趙與晉和反以兵三萬助晉擊
存孝存孝嬰城自守太祖自將兵傅其城掘塹以圍
之存孝縱兵成塹城中遂食盡登城呼曰兒蒙王恩

位至將相豈欲捨父子而附仇讐乃存信構陷之耳
願生見王一言而死太祖哀之遣劉夫人入城慰諭
之劉夫人引與俱來存孝泥首請罪曰兒於晉有功
而無過所以至此由存信為之耳太祖縛載車後車
裂之然雅惜其材悵然恨諸將之不能容也為之不
視事者十餘日康君立素善存信每左右存信以傾
之存孝已死太祖與諸將博語及存孝流涕不已君
立以為不然太祖怒斲殺君立

康君利謀勇過人初從李克用破黃巢攻河陽取潞州
所向無敵從莊宗破梁戰柏鄉屢建大功遷突騎指
揮使

李繼岌繼潼繼嵩繼蟾繼嶢胥莊宗子繼岌母曰劉皇
后同光初為北都留守判六軍諸衛事遷檢校太尉
同中書門下平章事又為興聖宮使三年封魏王是
歲伐蜀為西南面行營都統郭崇韜為都招討使工
部尚書任圜翰林學士李愚皆參軍事九月戊申將

兵六萬自鳳翔入大散關十月巳酉王衍上牋請降
丙辰入成都自出師至降衍凡七十五日然繼岌雖
為都統而軍政號令一出宗韜宦官李從襲向延嗣
馬彥珪等搆之四年正月繼岌從者李環搃碎宗韜
首遂班師四月辛卯至興平聞明宗兵入洛京行至
渭河西都留守張錢斷浮橋不得渡乃循河而東至
渭南左右皆潰繼岌遂殞焉葬於華州之西南同光
三年詔以皇子繼嵩繼潼繼蟾繼峽皆為光祿大夫

檢校司徒蓋其皆幼故不封不知其所終

康延孝代北人為太原軍卒亡命於梁為左右先鋒指
揮使復以百騎奔於唐莊宗解御衣金帶以賜之拜
博州刺史捧日軍使兼南面招討指揮使莊宗屏人
問延孝梁事延孝具言末帝懦弱趙巖壻也張漢傑
婦家皆用事段凝姦邪以入金多為大將自其父時
故將皆出其下王彥章驍將也遣漢傑監其軍而制
之小人進任而忠臣勇士皆見踈斥此其必亡之勢

也莊宗又問梁計如何曰竊聞梁且大舉莊宗曰何以禦之延孝曰梁兵雖衆分則無餘請待其既分以鐵騎五千自鄆趨汴出其不意擣其空虛不旬天下定矣莊宗甚壯其言後梁雖不出兵而梁兵悉屬段凝於河上京師無備莊宗卒用延孝策自鄆入汴凡八日而滅梁以功拜鄭州防禦使賜姓名曰李紹琛二年遷保義軍節度使三年征蜀為先鋒排陣斬斫使破鳳州取固鎮降興州與王衍戰三泉衍敗走

斷吉栢江浮橋延孝造舟以渡進取綿州行復斷綿
江浮橋延孝謂招撫使李嚴曰吾遠軍千里入人之
國利在速戰乘行破膽之時但得百騎過鹿頭關彼
將迎降不暇若修繕橋梁必留數日使行得閉關為
備則勝負未可知也因與嚴乘馬浮江軍士隨之濟
者千餘人遂入鹿頭關下漢州行弟宗弼果以蜀降
蜀平延孝功為多明年郭崇韜死魏王繼岌班師命
延孝以萬二千人為殿行至武連聞朱友謙無罪見

殺詔殺其子令德於遂州繼岌不遣延孝而遣董璋
延孝與璋有隙已自疑及璋過延孝軍又不謁延孝
大怒遂擁其衆自劍州返入蜀自稱西川節度三州
制置等使馳檄蜀人數日衆至五萬繼岌遣任圜以
七千騎追之及於漢州會孟知祥夾攻之延孝戰敗
被擒知祥酌大卮從檻車中問之延孝曰郭崇韜佐
命之臣功在第一兵不血刃而取兩川一旦無罪闔
門受戮顧如延孝何保首領以此不敢歸朝耳至鳳

翔遣宦者殺之

康思立山陰人少為騎將從莊宗破梁戰栢鄉以功遷
指揮使後歷應嵐二州刺史宿州團練使昭武軍節
度使徙鎮保義胥有善政

安重霸雲州人初與明宗俱事晉王後奔於蜀為親將
宦者王承休為節度使重霸為副使唐兵伐蜀重霸
勸承休赴難承休上道重霸立承休馬前辭曰秦隴
不可失願留為公守唐軍破蜀重霸以秦成階三州

降明宗以為閩州團練使罷為左衛大將軍久之為
匡國軍節度使廢帝時為京兆尹西京留守徙鎮大
同以病罷歸卒於潞州

安金全代北人驍果工騎射號能擒生踏伏事晉為騎
將數有功官至刺史以疾居於太原莊宗與梁相距
河上梁將王檀襲太原晉兵皆從莊宗太原無備監
軍張承業率諸司工匠登城扞禦而外攻甚急金全
彊起謂承業曰太原晉根本一旦不守則大事去矣

老夫今誠憊然尚能為公破賊承業授以甲兵金全
被甲跨馬召率子弟及故將吏得百餘人夜出北門
擊檀於羊馬城中檀軍驚潰而晉救兵稍至然莊宗
不以金全為能不錄其功金全與明宗有舊天成中
拜振武軍節度使同中書門下平章事在鎮二年召
還卒

安重誨應州人父福遷以驍勇知名晉兵救朱宣福遷
戰死重誨少事明宗明敏謹恪為安國軍中門使及

兵變於魏所與謀議大計皆重誨與霍彥威決之明宗即位為左領軍衛大將軍樞密使兼領山南東道節度使固辭不拜改兵部尚書使如故在位六年累加侍中兼中書令重誨以佐命功臣處機密之任事無大小皆所參決其勢傾動天下嘗出過御史臺門殿直馬延誤衝其前導重誨怒即臺門斬延而後奏宰相任圜以職事與重誨爭辭疾退朱守殷反重誨遣人殺圜而後白誣圜與守殷通謀因取三司積欠

二百餘萬請放之以悅人其威福自出若此重誨以天下為已任四方奏事皆先白後聞河南縣獻嘉禾一莖五穗視之曰偽也笞其人而遣之夏州李仁福進白鷹重誨却之而後白明宗陰取以入他日按鷹戒左右無使重誨知也宿州進白兔遂却而不白馬牧軍使田令方馬瘠多斃當死重誨諫曰使天下聞以馬故殺一軍使是謂貴畜而賤人令方因得減死醴泉令劉知章不時給回鶻侯三馬械至將殺之重

誨從容為言乃得不死其盡忠補益又若此重誨欲
內計社稷外制諸侯而獨見之慮禍釁旋生嘗怒錢
鏐寓書禮慢遣嬖吏韓玫副供奉官烏昭遇使吳越
玫還譖昭遇見鏐舞蹈稱臣昭遇坐死下制削奪鏐
官爵錢氏遂絕於唐潞王從珂為河中節度使重誨
謂從珂非李氏子後必為國家患欲陰圖之從珂聞
馬黃龍莊其牙內指揮使楊彥溫閉城報從珂曰彥
溫非叛也得樞密院宣請公趣歸朝廷耳從珂上變

明宗欲誘致彥溫重誨固請用兵乃遣侍衛指揮使樂彥稠西京留守索自通率兵討之彥稠等攻破河中希重誨旨斬彥溫以滅口從珂罷鎮重誨數諷宰相言從珂失守宜得罪他日又自論列明宗曰公欲如何處置我即從公重誨曰此父子之際非臣所宜言惟陛下裁之明宗曰吾為小校時衣食不能自足此兒為我擔石灰拾馬糞以相養活今貴為天子獨不能庇之耶使其杜門私第亦何與公事重誨由是

不復敢言孟知祥鎮西川董璋鎮東川皆有異志重
誨每事裁抑以精兵分戍二川既而遣李嚴為西川
監軍知祥大怒即日斬嚴又分閬州為保寧軍以李
仁矩為節度使璋舉兵攻殺仁矩二人遂皆反唐戍
蜀精兵皆陷初明宗幸汴州重誨議伐吳明宗難之
其後戶部尚書李鱗得吳諜者言徐知誥欲稱藩願
得安公一言以為信重誨以玉帶與諜者使遺知誥
初不以其事聞後知誥之問不至始奏貶鱗已而捧

聖都軍使李行德十將張儉告邊彥溫言重誨私募士卒繕治兵器欲自伐吳明宗疑之大臣左右皆為之辨因廷詰彥溫具伏其詐於是君臣相顧泣下彥溫行德儉皆坐族誅重誨因求解職明宗慰之重誨論請不已乃趣中書議代重誨者馮道曰諸君苟惜安公使得罷去是紓其禍也趙鳳謂大臣不可輕動居職復如故及董璋等反遣石敬瑭討之而糧運甚艱明宗欲自行重誨曰此臣之責也乃請行日馳數

百里遠近驚駭督趣糧運日夜不絕斃踣道路者不可勝數鳳翔節度使朱弘昭上言重誨怨望宣徽使孟漢瓊自行營還亦言西人震駭狀重誨行至三泉被召還拜河中節度使希旨者爭求其過宦官安希倫坐與重誨交私嘗陰伺宮中動息事發棄市重誨因告老以太子太師致仕而以李從璋為河中節度使遣藥彥稠率兵如河中虞變重誨二子崇緒崇贊宿衛京師聞制下奔其父重誨驚曰二渠安得來已

而曰吾以一死報國餘復何言乃械送二子於京師
行至陝州下獄明宗又遣翟光業至河中視重誨去
就光業至從璋率兵圍重誨第入拜於庭重誨降而
答拜從璋以槓擊其首重誨妻子抱之而呼又擊其
首夫妻皆死從璋檢責其家貲不及數千緡明宗下
詔以其絕錢鏐致孟知祥董璋反及議伐吳以為罪
并殺其二子其餘子孫皆免重誨得罪知其必死歎
曰我固當死但恨不與國家除去潞王此其恨也

折從阮字可久初名從遠避漢高祖名改為阮雲中人
父嗣倫為麟州刺史從阮溫恭長者居父喪以孝聞
為唐太原牙將後為府州刺史晉出帝時以兵攻契
丹取其城堡十餘遷團練使兼領朔州刺史安北都
護振武軍節度使契丹西南面行營馬步軍都虞候
漢高祖立於府州建永安軍以從阮為節度使明年
以其族朝京師徙鎮武勝即拜從阮子德辰為府州
團練使周太祖立歷徙宣義保義靜難三鎮顯德二

年罷還卒贈中書令

李從璟明宗子初名從審為人驍勇善戰而謙退謹勅
從莊宗戰數有功為金槍指揮使明宗軍變於魏莊
宗謂從璟曰爾父於國有大功忠孝之心朕自明信
今為亂軍所逼爾宜自往宣朕意毋使自疑從璟馳
至衛州為元行欽所執將殺之從璟呼曰我父為亂
軍所逼公等不亮其心我亦不能至魏願歸衛天子
行欽釋之莊宗憐其言賜名繼璟以為己子從莊宗

如汴將士多亡獨從璟不去左右或勸其逃禍不聽
莊宗聞明宗已渡黎陽復欲遣從璟通問行欽以為
不可遂殺之明宗即位贈太保

李從榮明宗子天成元年以檢校司徒兼御史大夫拜
天雄軍節度使同中書門下平章事三年徙鎮河東
長興元年拜河南尹兼判六軍諸衛事從璟死從榮
次最長又握兵柄是歲秋封秦王故事諸王受封不
朝廟而有司欲重其禮乃建議曰古者因禘嘗而發

爵祿所以示不敢專今受大封而不告廟非敬順之道也於是從榮朝服乘路車具鹵簿至朝堂受冊出載冊以車朝於太廟京師之人皆以為榮三年加兼中書令有司又言故事親王班宰相下今秦王位高而班下不稱於是與宰相分班而居右四年加尚書令食邑萬戶又加天下兵馬大元帥有司言元帥或統諸道或專一面自前世無天下大元帥之名其禮無所考按諸自節度使以下凡領兵職者皆具橐鞬

以軍禮庭叅其兼同中書門下平章事者初見亦如
之其後許如客禮凡元帥府文符行天下皆用帖又
升班在宰相上從榮大宴元帥府諸將皆有頒給控
鶴捧聖嚴衛指揮使人馬一匹絹十疋其諸軍指揮
使人絹十疋都頭已下七疋至三疋又請嚴衛捧聖
千人為牙兵十一月以罪被害於河南府

李從璋字子良明宗姪也少善騎射莊宗時將兵戍常
山聞明宗兵變於魏亦起兵據邢州明宗即位為捧

聖左廂都指揮使改皇城使領饒州刺史拜彰國軍節度使徙鎮義成明宗幸汴州從璋欲率民貢獻坐罷為右驍衛上將軍居久之出鎮保義徙河中長興四年夏封洋王晉初徙鎮威勝降封隴西郡公從璋鎮保義始折節自修在南陽頗有遺愛天福二年卒年五十一子重俊為虢州刺史坐贓後為商州刺史以罪死

劉崇劉信皆高祖弟承訓承祐承勳高祖子承訓早卒

追封魏王承勳為開封尹周廣順元年以疾卒追封
陳王劉贇河東節度使崇子周太祖入京師白漢太
后擇立漢嗣而宗室河東節度使崇等在者四人乃
為太后誥曰河東節度使崇許州節度使信皆高祖
之弟徐州節度使贇開封尹承勳皆高祖之子文武
百辟其擇嗣君以承大統時承勳久病乃共奏曰徐
州節度使贇高祖愛之以為子宜立為嗣遣太師馮
道率羣臣迎之道見贇傳太后意贇行至宋州周太

祖自澶州還京師遣侍衛馬軍指揮使郭崇以兵七
百騎衛贊贊登樓名崇崇不敢進馮道出與崇語崇
乃登樓見贊已而奪贊部下兵贊謂道曰寡人此來
所恃者以公三十年舊相是以不疑道默然贊客將
賈正等數目道欲圖之贊曰勿草草事豈出於公耶
道已出郭崇幽贊於外館殺賈正及判官董裔牙內
都虞候劉福孔目官夏昭度等周太祖監國太后下
詔曰比者樞密使郭威志安宗社議立長君以徐州

節度使贇高祖近親立為漢嗣乃自藩鎮召赴京師
雖誥命已行而軍情不附天道在北人心靡東適當
改卜之初俾膺分土之命贇可降授開府儀同三司
檢校太師上柱國封湘陰公贇以幽死初都押衙鞏
庭美教練使楊溫守徐州聞之閉城拒命廣順元年
三月王彥超克徐州庭美等皆見殺

史彥超雲州人勇悍驍捷為漢龍捷都指揮使以兵從
周太祖入汴遷虎捷都指揮使戍晉州劉旻來攻州

無主帥知州王萬敢不能拒彥超以戍兵堅守月餘
太祖遣王峻救之旻兵解去以功遷龍捷右廂都指
揮使領鄭州防禦使周漢戰高平彥超為前鋒先登
陷陣以功拜感德軍節度使周兵圍漢太原契丹救
漢出忻代世宗遣符彥卿拒之以彥超為先鋒戰忻
口彥超勇憤俱發左右馳擊解而復合者數四遂歿
於陣是時世宗敗漢高平乘勝而進久無成功欲解
去而未決聞彥超戰死遽班師倉卒之際亡失甚衆

世宗憂忿不食者數日贈彥超太師優卹其家焉

陸萬友蔚州靈邱人少業塢鎧隸太原為裨校漢祖擢
護聖指揮使出為天雄軍馬軍都指揮使周初擢散
員都指揮使領獎州刺史世宗時典龍捷控鶴虎捷
軍頭領虔州團練遷閬州防禦使宋初歷沂蘄二州
改汝州討南唐命守采石磯浮梁事平遷和州防禦
使太宗以為晉絳等州都巡檢使從征太原克汾石
二州就除石州都巡檢使兼知石州移巡警鳳翔秦

隴代歸改知瀛州尋改右監門衛大將軍充河陰兵馬都監卒年七十三萬友以武勇自任太宗念其勲舊恩遇不替聘其次女為許王夫人

郭宗應州金城人重厚寡言有方畧後唐清泰中為應州騎軍都校晉祖割雲應地奮身南歸歷鄆河中潞三鎮騎軍都校開運中戍太原會漢祖起以崇為前鋒入汴改護聖左第六軍都校領郢州刺史改領富州從周祖平河中以功遷果州防禦使領護聖右廂

都指揮使周祖鎮鄴以崇領行營騎軍兼天雄軍都
巡檢使乾祐三年冬從周祖走慕容彥超於劉子陂
補侍衛馬軍都指揮使樞密使王峻遣率七百騎東
拒相陰公贊過於睢陽崇陣牙門外贊懼登樓呼之
崇曰今遣崇等來衛非有他也及登樓具言軍情有
屬贊執崇手泣俄而贊所領衛兵都校張令超以衆
歸崇崇即送贊就館舍廣順初領定武軍節度又為
京城都巡檢使修城都部署兼知步軍公事未幾命

為陳州節度加同平章事出鎮澶州促還鎮所世宗
初并人侵潞命與符彥卿出固鎮以禦之世宗親征
又副彥卿為行營都部署加兼侍中冬移正定尹成
德軍節度四年契丹騎萬餘掠邊崇率攻下東鹿縣
斬數百級俘獲甚衆五年來朝賜襲衣金帶器弊鞍
勒馬恭帝加檢校太師宋初加兼中書令崇追感周
室恩遇時復泣下監軍陳思誨密奏之太祖曰我素
知崇篤於恩義蓋有所激發耳遣人覘之還言崇方

對賓屬坐池潭小亭飲博城中宴然太祖笑曰果如
朕言未幾來朝改命為平盧節度乾德三年卒五十
八贈太師子守璘洛苑副使妻即明德后姊也子允
恭以父任授殿直至崇儀副使知常州卒次女為仁
宗后天聖三年詔贈尚書令兼中書令守璘太尉寧
國軍節度允恭太傅安德軍節度六年又詔追封英
國公加贈守璘永清軍節度兼中書令允恭忠武軍
節度兼侍中允恭子中庸左侍禁閣門祇候副使中

和娶潁川郡王德彝女為西染院副使

宋

薛超平城人膂力絕世乾德初應募為虎捷卒從崔彥
進伐蜀以功補虞候太宗時累遷至天武指揮使從
征太原遷神衛軍都校後領澄州團練使

李重誨應州金城人祖高後唐莊宅使獎州刺史父彥
榮仕遼署環州刺史重誨嘗為應州馬步軍都指揮
使太平興國五年從節度使蕭咄李迎潘美戰於代

州北嶺大敗美擒重誨以獻補鄧州馬步軍都指揮
使會趙普出鎮奏監州軍雍熙三年為武州刺史忻
州都巡檢緣邊十八砦招安制置使賜服帶鞍馬遼
兵入以所部邀戰敗之獲羊馬鎧甲甚衆賜詔嘉美
改廣桂融宜柳州招安捉賊使聽便宜從事至道初
累遷涇原儀渭鎮戎軍鈐轄咸平三年徙邠寧環慶
路坐轉餉靈武至積石為所掠流光州五年起內殿
崇班鄜延駐泊都監俄遷崇儀使景德中上以涇原

地要兵衆徙為鈐轄復遷益州改皇城使大中祥符六年卒年六十八重誨純慤寡過上悼之命其子乘傳往護柩歸聽止驛舍錄次子禹謨將作監主簿弟重睿歷澄州團練使子禹偁閤門祇候

折德辰雲中大族父從阮自晉漢來據府州控扼西北仕周至靜難軍節度使其鎮府州時署德辰馬步軍都校廣順間周世宗建府州為永安軍以德辰為節度使時從阮鎮邠寧父子並領節鎮時人榮之顯德

中德辰率師攻下河市鎮斬并軍五百餘級入朝以
其弟德愿權總州事迎謁于通許橋請遷內地世宗
以其素得蕃情不許厚加賜賚而遣之德辰未至德
愿又破并軍五百餘於沙谷砦斬其將郝章張釗宋
初德辰又破河東河谷砦斬五百級建隆二年來朝
待遇有加遣歸鎮乾德元年敗太原軍於城下擒其
將楊璘二年卒年四十八贈侍中子御勳御卿

折御勳字世隆父德辰鎮府州表為右職德辰卒領汾

州團練使權知府州事開寶二年太祖征太原詣行
在謁見以為永安軍留後四年來朝五年復來朝改
秦寧軍節度使留開封太平興國二年卒年四十贈

侍中

折御卿德辰子幼補節院使兄御勲知州事署兵馬都
校御勲徙鎮名為閑廐副使知府州太宗征河東命
與尹憲領屯兵攻嵐州破岢嵐軍擒其軍使折令圖
以獻遂下嵐州又殺其憲州刺史霍翊擒其將馬延

忠等七人遷崇義使淳化三年四遷為府州觀察使
五年拜永安軍節度使遼師萬餘入寇大敗之於子
河汭斬五千級獲馬千匹遼將號突厥太尉司徒舍
利死者二十餘人擒其吐渾一人太宗遣使問之對
曰敵緣山峽小徑入謀剽畧臣諜知之遣人邀其歸
路因縱兵擊走之人馬墜崖谷死者相枕其大將韓
德威僅以身免皆聖靈所及非臣之功也上嘉之歲
餘德威諜知御卿病率衆來侵以報子河汭之役御

卿力疾出戰德威不敢進會疾甚其母密遣人召歸
御卿曰世受國恩邊寇未滅御卿罪也今臨敵棄士
卒自便不可死於軍中乃其分也為白太夫人無念
我忠孝豈兩全言訖泣下翊日卒年三十八上聞悼
惜久之贈侍中以其子惟正為洛苑使知州事惟正
歸朝以其弟惟昌繼之

折惟昌御卿子繼知府州事咸平二年河西黃女族及
啜訛引趙保吉衆入寇麟州萬戶谷進至松花砦惟

昌與從叔同巡檢使海超弟供奉官惟信赴戰臂中
流矢墜馬攝弓起得裨將馬突圍出海超惟信沒焉
九月保吉黨萬私保移埋復來寇與宋思恭劉文質
合戰於埋并峰敗走之又破言泥族拔黃砦焚其器
甲車帳俘斬甚衆以功領富州刺史改文思使景德
元年與王萬海破賊砦護芻糧抵麟州秋入朔州界
破狼水砦時遼方圍岢嵐軍遁去明年拜興州刺史
大中祥符二年赴闕命近臣與射於苑中宴賜甚厚

上言先臣御卿蒙賜旗三十竿以壯軍容請別給賜許之七年河東運糧赴麟州出兵為援力疾領步騎屯寧遠若冒風沙而行時疾已亟猶與賓佐晏飲談笑自若明日卒年三十七以其弟惟忠繼之

折惟忠字蓋臣初以兄惟信戰沒補西頭供奉官擢閤門祇候及惟昌卒為六宅使知府州兼麟府都巡檢使領普州刺史再遷左藏庫使真拜嘉州刺史改資州進蘭州團練使母喪起雲麾將軍卒惟忠知兵事

天聖中遼夏會兵境上聲言嫁娶惟忠覘實往備之
戒士卒無輕動一夕風霾有騎走營中言寇至惟忠
堅卧不動徐命擒之得數誕馬蓋寇所縱也既卒錄
其弟姪子孫七人以其子繼宣嗣州事久之特贈惟
忠耀州觀察使寶元中繼宣坐掇刻降左監門衛將
軍楚州都監以其弟右侍禁繼閔繼之官至西京作
坊使

周廣字大均應州神武川人父密晉鄴延晉三鎮節度

使周廣順初至太子太師致仕廣幼從父為牙校漢
初授供奉官尋擢左千牛衛將軍周祖討慕容彥超
為行營都監錄功遷右武衛俄改右神武充鎮淮軍
兵馬都監從征淮南命安集江北數州民甚德之因
領常州刺史兼內外馬步軍都軍頭淮南平改領眉
州宋初授隰州刺史乾德三年遷潘州團練使令訓
練雄武諸營開寶二年從征太原為攻城樓櫓戰擢
都部署師還加內外馬步軍副都軍頭六年改右屯

衛大將軍領郡如故太平興國二年卒

李漢超雲州雲中人初事鄴帥范延光鄴帥高行周皆
不見信用會周世宗鎮澶淵委質焉即位補殿前指
揮使三遷殿前都虞候宋初遷散員都指揮使領綿
州刺史控鶴左廂都校領恩州團練使從平李重進
遷齊州防禦使兼關南兵馬都監有民訟強娶其女
為妾及貸物不償者上問汝女可適何人對曰農夫
又問前漢超未至關南時何如曰歲苦契丹侵暴上

曰今復爾耶曰否上曰漢超朕貴臣汝女為其妾不
猶愈於農婦乎使漢超不守關南汝尚能保其家之
所有乎遣之去已乃密諭漢超曰亟還其女并所貸
不足於用何不告朕耶漢超感泣誓以死報在郡十
七年政平訟理吏民愛之詣闕求立碑頌德詔徐鉉
撰文以賜漢超素兄事馬仁瑀仁瑀監軍霸州擅發
麾下卒入遼境由是交惡上遣中使和解賜以金帛
太平興國初遷應州觀察使判齊州終關南都巡檢

使贈大尉忠武軍節度使漢超善撫士卒與同甘苦
及沒士多流涕

李守恩漢超子少驍果善戰有父風初補齊州牙職開
寶二年征太原從漢超軍中遼遣兵援河東至定州
西嘉山將入土門守恩領牙兵數千騎戰敗之斬首
三千級獲戰馬器械甚衆擒首領二十七人隨漢超
見行在賜戎服金帶器幣緡錢太祖曰此稚子能若
是他日將帥才也漢超卒擢驍猛軍校累官隴州刺

史知靈州與轉運使陳緯部芻糧過瀚海為賊所邀
守恩及子廣文助教象之隴州衙內指揮使望之弟
寄班守忠皆沒真宗震悼特贈洪州觀察使次子祐
之順之用之潤之慶之成之藏之

畢士安字仁叟代州雲中人曾祖宗昱雲中縣令祖珠
雲州別駕父又林終觀城令因僑觀城士安少好學
事繼母祝氏孝求師至鄭友楊璞韓丕劉錫因僑鄭
乾德四年第進士邠帥楊廷璋辟掌書奏開寶四年

歷濟州團練推官掌筦歲課增羨改兗州觀察推
官太平興國初為大理寺丞領三門發軍事選知台
州言錢氏上圖籍有司皆張侈賦數願一用舊籍從
之明年遷左贊善大夫徙饒州改殿中丞召為監察
御史復出知乾州乞降任就養改監汝州稻田務雍
熙二年遷左拾遺兼冀王府記室叅軍太宗召諭賜
襲衣銀帶鞍勒馬士安本名士元以犯王諱改焉遷
考功員外郎端拱中詔王府寮屬獻文上閱視累日

問近臣曰其行孰優或以士安對上曰正協朕意俄以本官知制誥王願留府邸不許淳化二年召入翰林為學士大臣以張洎薦上曰洎視畢士安詞藝踐歷固不減但履行遠在下爾三年知貢舉加主客郎中以疾改右諫議大夫知潁州壽王尹開封府名為判官及正承華兼右庶子遷給事中登位命權知開封府拜工部侍郎樞密直學士時近臣強取民間女士安因對奏還之官府常從授外任必令士女戒勗

咸平初拜禮部侍郎復為翰林學士詔選官校勳三國志晉唐書或言兩晉事多鄙惡士安曰惡以戒世善以勸後善惡之事春秋備載上然之遂命刊刻以目疾改兵部侍郎出知潞州特加月給入為翰林侍讀學士景德初兼秘書監首疏五事陳選將餉兵理財之策上嘉納李沆卒進吏部侍郎參知政事入謝上曰未也行且相卿士安頓首上曰朕倚卿輔相豈特今日然時方多事求與卿同進者其誰可對曰臣

駕朽實不足勝任寇準兼資忠義善斷大事此宰相才也上曰聞其好剛使氣對曰準方正慷慨有大節忘身徇國秉道疾邪朝臣罕出其右第不為流俗所喜今天下雖蒙涵養然西北跳梁為邊境患若準者正所宜用上曰然當藉卿宿德鎮之未閱月以本官與準同拜平章事士安兼監修國史居準上準為相守正嫉惡小人日思傾之布衣申宗古告準交通安王元傑準惶恐士安力辨其誣下宗古吏具得姦

周斬之準乃安景德元年九月遼統軍達蘭至天雄
兵號二十萬上問策安出士安與準條畫禦備又合
議請幸澶淵士安言澶淵之行當在仲冬準謂當亟
往不可緩卒用士安議初咸平六年雲州觀察使王
繼忠陷遼至是奏請議和大臣莫敢任獨士安以為
可信力言當羈縻不絕漸許其成上疑其不可保士
安曰彼戰不得志欲引去而耻無名且彼寧不畏乘
虛覆其巢穴繼忠奏殆不妄臣請任之上喜手詔許

其請和時已詔巡幸而大臣猶進金陵成都圖士安
亟同準請對力陳其不可惟堅定前計上嚴兵將行
太白晝見流星出上台北貫斗魁或言大臣應之士
安適卧疾移書準曰屢請昇疾從行手詔不許今大
計已定唯君勉之士安得以身當星變而就國事心
所願也已而少間追至澶淵遼師營澶北伏弩射斃
達蘭遼衆遁會曹利用使還具得要領又偕遼使姚
東之來和議遂定歲遺銀絹三十萬朝論以為過士

安曰不如此遼所顧不重和事恐不能久及罷兵從
還乃按邊要選良守將雄州以李允則定州馬知節
鎮州孫全照保州楊廷昭它所擇用各得其任令塞
上得境外牛馬悉還之通互市除鐵禁招流亡廣儲
蓄未幾夏州趙德明亦款附量時制法次第施行復
置賢良方正直言極諫等科二年章七八上以病求
免優詔敦諭不得已復起視事十月晨朝至崇政殿
廬疾暴作上步出臨視已不能言詔內侍竇神寶以

肩輿送歸第卒年六十八駕臨之廢朝五日贈太傅
中書令諡文簡以皇城使衛紹欽治葬給鹵簿錄其
子世長太子中舍慶長大理寺丞孫從古將作監主
簿士安端方沉雅有清識所至以嚴正稱年耆目眊
讀書不輟有文集三十卷嘗謂人曰僕仕宦無赫赫
譽但力自規檢庶幾寡過爾凡交遊無黨援惟王祐
呂端見引重王旦寇準楊億相友善王禹偁陳彭年
皆門人也禹偁幼時以事至濟州官舍士安識其非

常童留之教以學舉業日顯後遂登科先進用士安
知制誥其命乃禹偁詞也士安沒上謂寇準等曰畢
士安善人也事朕南府東宮以至輔相飭躬慎行有
古人之風遽此淪沒深可悼惜及王旦為相面奏陛
下前稱畢士安清慎如古人士安仕至輔相而四方
無田園居第沒未終喪家用已屈真不負陛下所知
宜有以周之上感歎賜白金五千兩子世長衛尉卿
慶長大府卿孫從善光祿少卿從古駕部郎中從厚

從誨檢校水部員外郎從簡博羅令從道殿中丞從
範山南西道節度推官從益太常寺太祝從周朝散
郎知洋州曾孫仲達仲偃至郡守仲行仲游仲愈

折繼閔字廣孝慶厯中元昊攻麟州不克進圍州城城
險且堅東南有水門厓壁峭絕阻河賊緣厓腹微徑
魚貫而前城中矢石亂下賊轉攻城北士卒復力戰
賊多死傷引去圍豐州遂陷之繼閔以城守勞特遷
官苑使普州刺史尋護送麟州戍卒冬服賊伏兵邀

掠之脫身繇間道歸奪宮苑使後復官領果州團練使自元昊拒命招輯歸業凡三千餘戶皇祐二年卒以其弟繼祖繼之

折繼祖字應之由右侍禁遷西染院使累轉皇城使成州團練使臨政二十餘年奏乞書籍仁宗賜以九經韓絳發河東兵城囉兀繼祖為先鋒深入敵帳降部落戶八百加解州防禦使卒繼祖子當襲州事請以授兄之子克柔詔從之而進其三子官錄二孫為借

職

折繼世繼祖弟少從軍為延州東路巡檢嵬名山內附
繼世先知之遣其子克勲報种諤諤用是取綏州繼
世以騎步萬軍於懷寧砦入晉祠谷往銀川分名山
之衆萬五千戶居於大理河夏來攻再戰皆捷諤逮
繫以兵付之遂同名山守綏州錄功領忠州刺史說
韓絳城囉兀以撫橫山因畫取河南策絳然之以左
騏驎使果州團練使卒詔繼世蕃官捍邊有績特給

賻禮

折克行字遵道繼閔子初事軍府無所知名种諤拒夏人於環慶詔河東援之克行請往諤使以兵三千護餉道戰葭蘆川先登斬級四百降戶千馬畜萬計諸老將矍然曰真折太尉子也擢知府州張世矩將河外軍民以討夏詔選兵隸之克行抗章願率部落先驅未報即委管鑰而西咩保吳良以萬騎來躡克行為後拒度賊半度隘縱擊大破之殺咩保吳良師還

自劾釋不問王中正出塞克行先拔宥州每出必勝
夏人畏之益左廂兵專以當折氏太原孫覽議城葭
蘆克行即頓兵吐渾河約勒部伍為深入窮討狀敵
疑不敢動既訖役又入津慶龍橫川斬級三千詔河
東進築八砦通道廊延帥遣秦希甫來議克行請
兩路併力以遠者為先希甫曰由近及遠法也克行
曰不然事有奇正今乘士氣之銳所利在速故先遠
後以出其不意若徐圖之士心且怠矣二議上卒用

克行策城成謀言寇至軍中皆戒嚴克行止之曰彼自擾耳已而果然克行在邊三十年善拊士卒戰功最多羗人呼為折家父官至秦州觀察使卒贈武安軍節度使子可大為營州團練使知府州

折可適克行從子少工馳射廊延郭遠見之歎曰真將種也薦試廷中補殿侍隸延州出塞遇敵馬索與鬪斬其首取馬而還益知名米脂之役與夏人戰三角嶺得級多又敗之於蒲桃谷東兵久不得食千人籍

籍可適單馬出詰之曰爾輩不念父母妻子而甘心
為異域鬼耶皆回面聲喏流涕謝再生各遣歸夏人
十萬入寇可適先得其守烽卒姓名詐為首領行視
呼出盡斬之烽不傳因卷甲疾趨大破之于尾丁磴
回次檉楊溝正午駐營分騎據西山曰彼若躡吾後
腹背受敵必敗果舉軍來可適所部纔八千轉戰至
高嶺乃從間道趣洪德設伏邀其歸路敵至伏發衝
之其國母踰山而遁焚棄輜重衆赴崖澗死者如積

論前後功至皇城使成州團練使知岷蘭州鎮戎軍
渭帥章榘築好水川命可適將軍為總管王文振副
熙州兵千人失道盡死文振歸罪可適宰相章惇欲
按軍法哲宗不許削十三官榘請留以責效乃權第
十二將詔密圖夏寇名阿埋昧勒都逋二酋會境上
謀知之遣兵夜往襲并俘其族屬三千人遂取天都
山上為御文德殿受賀以其地為西安州遷可適東
上閣門使洺州防禦使涇原鈐轄知州事真拜和州

防禦使進明州觀察使為副都總管帥鍾傳行邊為敵所隔以輕騎拔之得歸傳議取靈武環慶亦請出師命可適將萬騎往即薄靈州川俘獲甚夥而慶兵不至引還入覲上訪以傳策對曰得之易守之難當先侵弱其地待吾藩籬既固然後可圖上曰卿言是也進武安軍節度觀察留後步軍都虞候大城蕭關與傳議齟齬會踏口覆師數百貶鄭州觀察使俄知衛州拜淮康軍節度使轉運使請平夏通峽鎮戎西

安四砦置芻粟五百萬可適以費大難之又欲借車牛及致十萬斛於熙河皆不從構之名為佑神觀使明年復為渭州命其子彥質直秘閣參軍事數月卒年六十一

畢仲衍字夷仲士安曾孫蔭陽翟主簿縣人張昇鎮許請興鄉校既具材又聽民輸助邑子馬宏謾語諸豪縣令將取諸民誠捐百金予我能止役豪予百金宏即宣言吏過昇軟縣且止令欲辨仲衍曰無益不

如取宏治之會攝縣事即逮捕驗治五日得其姦言
於昇流宏鄧州一縣相賀給事中張問曰諺云鋤一
惡長十善君之謂也第進士調沈丘令歐陽修呂公
著薦之入司農為主簿升丞吳充引為中書檢正使
遼宴射連破的衆驚異密取其衣為度制服以賜時
預遼元會盡能記其朝儀節奏圖畫歸獻後錢勰出
使猶問畢少卿何官今安在王珪以仲行為充所用
留滯不遷經四年乃以祕閣校理同知太常禮院為

官制局檢討官損益刪補曲盡其當禁內問事必須
仲行然後報他人不知也撰中書備對三十卷士大
夫爭傳其書館高麗使上元夕宴東闕下作詩誦聖
德上次韻賜焉時以為寵擢起居郎王珪爭之上連
稱曰是當得未幾卒年四十三遣中使賻錢五十萬
畢仲游字公叔士安曾孫與仲行同登第調壽丘柘城
主簿羅山令環慶轉運司幹辦公事從高遵裕西征
運期迫遽餽輓夫三十萬一旦悉集轉運使范純粹

李察度受其賦而給之食必曠日乃可僚屬不知所
為仲游集諸縣吏令先効金帛緡錢之最戒勿啟局
緡共簿其名數以為質預飭具斛量數千洞徹倉庾
牆壁使羸糧者至其所人自斟槩輸其半而以半自
給不終朝霍然而散翊日大軍遂行純粹察歎且謝
曰非君幾敗吾事元祐初為軍器衛尉丞召試學士
院同黃庭堅張耒晁補之輩策問蘇軾異其文擢第
一加集賢校理開封府推官出提點河東路刑獄韓

縝以故相在太原奴告卒剽其衣縝將寘卒於理仲游曰奴衣服尠薄而敢掠之於帥牙非人情也取以付獄治卒得免太原銅器名天下買二茶七去縝曰如公叔可謂真清矣召拜職方司勳二員外郎改祕閣校理知耀州歲大旱先民未饑揭喻境內曰郡振施與平糴若干萬碩實虛張其數富室知有備亦相勸發廩民就食者十七萬九千口無一人去其鄉徽宗時歷知鄭鄆二州京南淮南轉運副使入為吏部

郎中言孔子廟自顏回以降皆爵命於朝冠冕居正而子鯉孫伋乃野服幅中以祭為不稱詔皆追侯之仲游早受知於司馬光呂公著不及用范純仁尤知之當國時又適母喪故未嘗得尺寸進然亦墮黨籍坎壈散秩而終年七十五仲游為文切於事理不為浮誇誕戲語蘇軾在館閣頗以言語文章規切時政貽書戒之司馬光為政反王安石所為仲游又予之書光軾得書聳然竟如其慮仲愈歷國子監丞諸王

府侍講知鳳翔府坐兄仲游黨籍例黜上曰畢仲衍
被遇裕陵可除罪籍以為都官郎中擢祕書少監卒

遼

沙彥珣多勇略有大志唐明宗目為人傑俾掌禁軍隨
授彰國軍節度使後石晉割山後十六州賂契丹遇
安巴堅歸過雲中彥珣出迎遂被留禮遇同於宿將
以功陞始平安節度檢校太尉

陳昭衮小字王九雲州人工譯鞮勇而善射統和中補

祇候郎君為奚蘇拉詳袞累遷敦睦宮太保兼掌圍
場事開泰五年秋大獵帝射虎以馬馳太速矢不及
發虎怒奮勢將犯蹕左右辟易昭袞捨馬捉虎兩耳
騎之虎駭且逸上命衛士追射大呼止之虎雖軼山
終不墮地伺便拔佩刀殺之輦至上前慰勞良久即
日設燕悉賜以席上金銀器特加節鉞遷圍場都太
師賜國姓命張儉李德懋賜詩以美之後拜歸義軍
節度使同知上京留守歷西南面招討都監卒

金

牛德昌蔚州人父鐸遼將作大監德昌少孤其母教之
學有勸以就廕者母曰大監遺命不使作承奉也中
皇統二年進士調礮山簿遷萬泉令屬蒲陝荐饑羣
盜充斥德昌到官榜曰民苦饑寒剽掠鄉聚以偷旦
夕之命甚可憐也能自新者一不問賊皆解散府尹
王伯龍嘉之累官刑部吏部侍郎中都路轉運使廣
寧太原尹卒贈中奉大夫

蘇保衡字宗尹雲中天成人父京遼進士為西京留守
宗翰兵至京出降久之病篤托以保衡京死宗翰薦
之於朝賜進士出身補太子洗馬調解州軍事判官
辟薩里哈陝西幕府叅議軍事累官同知興宗尹天
德間繕治中都張浩舉分督工役改大興少尹督諸
陵工遷工部尚書會伐宋與徐文等督造戰艦於通
州兵興以為朔東道水軍都統制率舟師泛海徑趨
臨安宋兵來襲敗於海中副統制鄭家死之大定二

年召赴中都時山東盜賊嘯聚百姓困弊詔保衡安撫山東發倉粟給布帛無妻室者具名以聞還改刑部尚書遣往河南山東陝西宣問屯田軍人有立功者具名以聞先登敗敵者正軍及阿喇實補官一階明安穆昆上功狀尚書省布薩忠義伐宋命行戶部於關中兼糾察許以便宜黜守令不法者十餘人邠守傅慎微忤用事者被讒搆下獄力救之得免入為太常卿遷禮部尚書拜叅知政事三年宋人請和詔

往南京與忠義斟酌事宜行之入奏進尚書右丞詔
監護諸殿後六年冬有疾求致任不許七年二月庚
寅卒年五十五輟朝賻贈命有司致祭

康元弼字輔之大同雲中人幼敏學善屬文登正隆二
年進士第調汝陽縣簿改崇義軍節度判官由垣曲
縣令補尚書省令史累遷同知河北西路轉運使事
召為大理丞大定二十七年河決曹濮間瀕水者多
墊溺遣往相視其地如盜而城在盜中請命於朝徙

築北原曹人賴馬出為弘州刺史閱歲授大理少卿
先是衛城亦為河壞增築蘇門以寓州治水既退民
不樂遷欲復歸衛又遣元弼按視還言治故城便遂
復其舊轉祕書少監兼著作郎改通州刺史兼領漕
事章宗立尊孝懿為皇太后以元弼舊臣詔充副衛
尉再轉大理卿以喪去起復為刑部侍郎兼鄆王傅
遷南京路轉運使承安三年致仕卒

高汝礪字巖夫應州金城人登大定十九年進士第蒞

官有能聲累除同知絳陽軍節度事明昌五年選陞
石州刺史承安元年入為左司郎中遇紫宸殿奏事
侍臣皆迴避上涼扇忽墮案下以非職不敢取進上
以為知體尋擢左諫議大夫建言郡縣調發軍須追
胥走卒利其事急規取貨賂深為民害自今有犯者
乞權依推排受財法治之庶使小人有所畏懼上從
其言定軍前差發受財制時遇奏事臺臣亦令迴避
汝礪請有司奏事諫官得以預聞修注職皆當一體

從之又言年前十月嘗舉行推排之法尋以踰時而止誠知聖上愛民之深也切聞周制以歲時定民之衆寡辨物之多少入其數於小司徒以施政教以行徵令三年則天下大比按為定法伏自大定四年通檢前後迄今三十餘年貧戶益多如止循例推排恐新強之家預為請囑虛作貧乏故以產業低價典質及將財物徙置他所權止營運今欲盡革奸弊莫若據實通檢預令有司照勘大定四年條理嚴立罪賞

截日立限關防禁約其間有可以輕重者斟酌行之
去煩碎而就簡易戒騷擾而事鎮靜則富者不得苟
避困者庶幾少息矣是歲十月命與戶部尚書賈執
剛先推排在都兩警巡院諸路所差官視以為法尋
同知大興府事歷陝西東路轉運使泰和元年改西
京路轉運使泰和二年轉北京臨潢府路按察使四
年又遷河北西路轉運使十一月進中都路都轉運
使六年六月拜戶部尚書時鈔法不能流轉隨事上

言多所更定民甚便之上嘉其議勅尚書省比應詔
言事不啻千數俱不達各司利害汗漫陳說莫能詳
盡惟高汝礪論本部數事並切事情皆已行之其論
內外百司各究利害舉明貞祐二年宣宗南遷次邯
鄲拜參知政事次湯陰聞汴京穀價騰踴宰臣請命
留守司禁約汝礪曰物價低昂朝夕或異然糴多糶
少則貴諸路之人輻湊河南糴者既多安得不貴若
禁止之有粟之家皆將閉而不出商旅轉販亦不復

入城則糴者益急而貴益甚矣今穀少而難得鈔多而易致自當先其所難後其所易多方開誘務使出粟更鈔例穀價自平矣上從之三年五月北兵將渡河朝議盡起河北諸路軍戶共圖保守而徙其家屬於河南汝礪言此事果行但便於豪強貧戶安能徙夫人情安土重遷彼一旦棄去田園扶攜老幼驅馳道路流離失所者多矣况所過百姓必將驚疑謂國家分別彼此而軍人已去其家令護衛他人其勢又

必不肯盡心此其利害所係至重乞先令元帥府宣
撫司總管府熟論可否然後施行不報軍戶既遷將
括地分授之佃官田者亦言願以給軍汝礪奏遷徙
軍戶一時之事民佃官田久遠之計河南民地官田
計數相半佃者率皆貧民一旦奪之何以自活夫小
民易動難安一時避賦遂有此言及其與人即前日
之主今還為客怨悔隨生矣如山東撥地時腴田沃
壤盡入勢家瘠惡者乃付貧戶無益於軍而民有損

至於互相憎疾今猶未已足為鑒戒惟當倍益官租以給軍糧之半復以係官荒田牧馬草地量數付之令其自耕則百姓免失業而官司不為民厲矣上從之尋遷尚書右丞又奏在官荒田及牧地民多私耕今正藝麥時乞盡九月而後撥量收所得以補軍儲則公私俱便十月又言今河北軍戶徙河南者幾百萬口人日給米一升歲率三百六十萬石半給其直猶支粟三百萬石河南租地計二十四萬頃歲徵粟

纔一百五十六萬有奇乞倍徵以給仍以閒田及牧地畀之乃遣右司諫馮開等分給人三十畝而軍人皆言地瘠惡不可耕可耕者又僻遠汝礪遂請罷之給軍糧之半而半折以實直焉四年正月轉左丞乞致仕不許時議發兵河北護民芟麥民間傳官將盡收之高琪奏樞密院遣兵居衝要鎮遏土寇仍許收逃戶之田汝礪曰甚非計也河朔之民惟恃麥今已有流言而復以兵往是益使之疑懼也不若聽其自

便令宣撫司禁戢無賴足矣逃戶田歸有司可也後
卒罷又請召還行樞密副使胥鼎於朝省不從高琪
欲歲闋民田汝礪言其三不可議遂寢興定元年十
月邊臣請與宋議和以息民䟽言其非計時宣宗志
在南伐也十一月上言臣聞國以民為基民以財為
本是以王者必先愛養基本國家調發河南為重所
徵稅租率常三倍於舊今省部計歲收通寶不敷所
支乃於民間科斂桑皮故紙錢七千萬貫以補之近

以通寶稍滯又加兩倍河南人戶農民居三之二今
稅租猶多未足而此令復出彼不糶所當輸租則必
減其食以應之夫事有難易勢有緩急今急用而難
得者芻糧也出於民力其來有限可緩圖而易為者
鈔法也行於國家其變無窮向者大鈔滯更為小鈔
小鈔弊改為寶券寶券不行易為通寶從權制變皆
由於上尚何以煩民為哉彼悉力以奉軍儲已患不
足而又添徵通寶苟不能給則有逃亡民逃亡則農

事廢兵食何自而得有司不究遠圖而貪近效不固
本原而較末節誠恐軍儲鈔法兩有所妨臣非於鈔
法不為意也非與省部故相違也但以鈔法稍滯物
價稍增之害輕民生不安軍儲不給之害重耳惟陛
下外度事務俯察臣言特命有司減免則羣心和悅
而未足之租有所望矣時賈全苗道潤等相攻不和
廷議將分畀州縣別署名號以處之又上書言其非
計議遂寢三年河南頗豐稔民多積粟汝礪奏國家

之務莫重於食今所在屯兵益衆而修築新城其費亦廣若不及此豐年多方營辦防秋之際或乏軍興乞於河南州府權宜立式凡內外四品以下雜正班散官及承蔭人免當僦使監官功酬僧道官師德號度牒寺觀院額等並聽賣之司縣官有能勸誘輸粟至三千石者將來注授升本榜首五千石以上遷官一階萬石以上升職一等並注見闕庶幾人知勸慕多所收獲從之提舉權貨司王三錫建議權油高琪

以用度方急勸上行之汝礪上言其五害詔集百官
議禮部尚書楊雲翼等多以為不可遂罷之十月賜
金鼎一重幣三四年三月拜平章政事俄進尚書右
丞相監修國史封壽國公屢乞致仕不允先是上令
侍朝坐殿下五年九月又諭奏事畢用寶之際可先
退坐謝不敢十月遷榮祿大夫元光元年七月上語
宰臣章宗時用度甚多得不闕乏者蓋先朝有以遺
之因進言曰儉乃帝王大德陛下言及此天下福也

上嘗言有功者人喜謗議朕必深求其實雖近侍不敢輕信對曰公生明偏生暗陛下未嘗徇一己愛憎有所毀譽惟聖明故能如是耳上嘗論毀譽又對曰昔齊威王封即墨大夫烹阿大夫及左右之嘗毀譽者而羣臣恐懼莫敢飾非陛下言及此治平可期也二年詔免朝拜侍立仍敕有司殿下設榻上嘗論人才對曰心不正而濟之以才所謂虎而翼者雖古聖人亦未易知又曰人才少全亦隨其所長取之耳上

胥以為然哀宗初諫官論其欺君固位天下所共嫉
宜黜之以勵百官又有投匿名書云高某不退當殺
之告老優詔不許正大元年三月卒年七十一配享
宣宗廟庭汝礪慎密廉潔能結主知又雅附高琪在
位十餘年規守格法循默避事未嘗有譴訶士論以
貪戀不去譏之

田琢定安人明昌進士調寧邊荏平主簿累官至山東
東路轉運使權知益都府事行六部尚書宣差便益

招撫使卒於兵

魏璠字邦彥渾源人貞祐二年進士天興元年哀宗走歸德時璠為翰林修撰遣問道名參知政事河南行省武仙行至裕州會仙敗於柳河乃矯詔招集潰軍以待仙仙疑璠圖已二年正月仙閱兵選鋒尚十萬璠曰主上旦夕西首望公公不宜久留於此仙怒幾殺璠璠還歸德仙奏請誅璠哀宗不聽以璠為歸德

元帥府經歷官

張升字進之大同人戶工部令史出身為漁陽簿遷絳州錄事天興二年十一月河解元帥趙偉自金雞堡渡河入陝州劫殺行省阿爾布哈諾爾實喇升謂知識者曰我本小人受國家官祿今日國家遭不幸我不能從反賊言訖赴水死岸上數百人皆嗟惜之

康公弼應州人舉進士累官乾州節度使初為寧遠令歲歉請蠲賦民為立祠嘗陷盜中盜使護送出境曰此良吏也

元

趙璿蔚州人幼不羈習武事事太祖以功授冀州行軍都元帥璿讓其兄珪改授軍民總管累遷河南道提刑按察使卒追封定國公諡襄穆子秉溫受學劉秉忠累官昭文館大學士

庫庫楚唐古氏世祖時擢大同路廣勝庫達嚕噶齊廣勝貯兵器時總管唐古哈雅以庫作公署置甲仗於虛廩多被虫鼠害庫庫楚言於上復之使者薛綽布

哈尼雅斯拉迪音檄取鷹房軍衣甲弓矢庫庫楚責其入
文書領去時憲副默爾們令毋入文書且命有司封
鑰其庫將點視之庫庫楚不從事聞命答默爾們罷
之大德元年陞大同路武州達魯噶齊兼管本州諸
軍鄂囉勸農事

趙璧字寶仁雲中懷仁人世祖為太弟時召見呼秀才
而不名賜三僮給薪水命後宮親製衣衣之命馳驛
聘名士王鶚等又令蒙古生十人從授書且敕璧習

國語譯大學衍義時從馬上聽之辭旨明貫輒大喜
憲宗嘗問曰天下何如而治對曰請先誅近侍之不
善者憲宗不悅璧退太弟曰秀才渾身是膽也斷事
官伊囉幹齊持印上請時璧侍傍呵之曰用汝與否
尚須聖裁乃敢以印為請奪其印置帝前帝默然久
之曰朕亦不能為此其人竟不復用壬子出為河南
經畧使劉萬戶貪淫其黨董王簿強取民女三十餘
人璧按其罪立斬之盡還民女劉大驚會雨雪上賀

璧曰如董主簿者尚不乏人俟盡誅之瑞應將大至矣劉悖死世祖即位拜中書平章政事從噶必齊討李壇璧得粟及羊豕饋軍軍聲大振帝欲為文檄宋藁數易皆不稱旨召璧為之文成帝喜曰惟秀才曲盡我意改樞密副使命詣都元帥阿珠軍同行漢軍都元帥事宋將夏貴自武昌援襄陽時漢水暴漲璧據險設伏以待貴中夜潛上璧策馬出鹿門山行二十餘里伏發奪其五舟及旦阿珠領騎兵璧率水軍

合戰於虎尾洲貴大敗走尋召還改中書左丞高麗
王王植為林衍所逐命同國王頭輦哥行東京等路
中書省事聚兵平壤壁議曰高麗遷居江華島外雖
卑詞臣貢內恃其險故權臣無所畏忌擅逐其主今
衍已死王實無罪若遣兵護歸使復國于古京可以
安兵息民策之上也帝從之師還復拜平章政事卒

諡忠亮

張從儉大同人延祐中為榆次令有異政邑中耆老立

碑記之

李伯述應州人至正間為河南省左丞卒於兵追封魏

國公諡忠愍

張文顯懷仁人至正間累官吏部尚書清正有守

曹子明懷仁人至正間任上都縣令公正敢為惟義是

守

孫公亮父威以製甲累官都總管公亮少有大志練習

國典承父廕佩銀符上章請設御史臺以正紀綱遂

拜監察御史職滿憲長奏公亮供職無私可再任俾
矜式後進累遷至行工部尚書

高定渾源人好學敦信尚氣節仕為雲中招討使都元
帥永安軍節度使定謂諸子曰吾蒙國恩致位侯伯
布衣之極曷敢久貪爵寵乎遂致仕去

安明本山陰人初為千夫長戍繁峙韓元帥皓見明本
特異授以忠州都統賜銀符使招誘殘民歸田里後
遷平陽元帥百姓惜其去攀號留之復召還忠州以

慰百姓

忽蘭大同人世襲大同路達魯噶齊經七世贈推忠翊
運開府儀同三司上柱國金紫光祿大夫太師寧王
杜唐卿大同人曾為浙江省叅政德學高古

韓浩大同人任便宜都元帥兼應州彰國軍節度使撫
愛軍民具有方畧

張守中廣靈人任元帥屢戡勁敵

山西通志卷一百十七